

Хамза АЛЛАМБЕРГЕНОВ

ҒАЙРИТАБИЙ
ОБРАЗЛАРНИҢ
МИФОЛОГИК
АСОСЛАРИ

**ЎЗБЕКИСТОН РЕСПУБЛИКАСИ ХАЛҚ ТАЪЛИМИ
ВАЗИРЛИГИ**

**АЖИНИЁЗ НОМИДАГИ НУКУС ДАВЛАТ
ПЕДАГОГИКА ИНСТИТУТИ**

ҲАМЗА АЛЛАМБЕРГЕНОВ

**ҒАЙРИТАБИЙ ОБРАЗЛАРНИНГ
МИФОЛОГИК АСОСЛАРИ**

Тошкент
«Мұхаррір» наşriёti
2013

УЎК: 811.512.133

КБК 83.3(5)

A-45

Алламбергенов, Ҳамза.

A-45 Файритабиий образларнинг мифологик асослари / Ҳ.Алламбергенов; масъул муҳаррир Н.Раҳмонов; Ўзбекистон Республикаси Халқ таълими вазирлиги; Ажиниёз номидаги Нукус давлат педагогика институти. – Тошкент: «Muхаррир nashriyoti», 2013, 56 б.

ISBN 978-9943-25-226-4

Тақдим этилаётган қўлланма қадимги туркий адабиётда, туркий халқлар фольклорида ва қадимги тасвирий ва амалий санъатда мифологиянинг ўзига хослиги ва ёзма, оғзаки ва санъатда ўзаро уйғулиги масалалари тадқиқига бағишиланган. Туркий халқлар сехрли-фантастик эртаклари мисолида икки ва кўп қиёфали тимсоллар ҳамда уларнинг энг қадимги бадиий тафаккур маҳсули сифатидаги мазмун-моҳияти, ибтидоий фикрлаш тарзининг табиатдан ажralмагани ва бунинг қонуниятлари хусусида мушоҳада юритилади. Китобда бадиий тафаккурнинг тадрижий такомили, мифологик фикрлашнинг манбалари таҳлил қилинади.

Рисола адабиётшуносларга, фольклоршуносларга, олий ўкув юртлари филология ихтисослиги бўйича таълим олаётган бакалавр ва магистр талабаларга, шунингдек, маданият тарихи билан қизикувчи кенг китобхонлар оммасига мўлжалланган.

УЎК: 811.512.133

КБК 83.3(5)

Масъул муҳаррир:

Н.РАҲМОНОВ

филология фанлари доктори,
профессор

Тақризчилар:

К.ҚУРАМБОЕВ

филология фанлари доктори, профессор

Ш.ТУРДИМОВ

филология фанлари доктори

ISBN 978-9943-25-226-4

© «Муҳаррир» нашриёти,

Тошкент, 2013 йил.

КИРИШ

Сюжет ҳамда мотивларнинг анъанавийлиги қадимги ёзма адабиёт, шунингдек, ҳалқ оғзаки ижоди табиатига хос муҳим жиҳатлардандир. Қаҳрамоннинг сехрли олами бетакрор, ибтидоий тасаввурлари аниқ, майший тафсилотлари лўнда бўлиб, бу ҳолат ўз давридаги мантиқий, адабий тушунчаларнинг ўзига хослигидан далолат беради. Айни пайтда бадиий шаклда ўсиш-ўзгаришлар тизими одамзод дунёқараши соддадан мунтазам равишда мураккаблашишга томон боришини тасдиқлайди.

Ёзма адабиётнинг манбаи ва маншай мифларда, афсона, эртак ва достонларда. Бу унсурларсиз ёзма адабиёт ривож топиши мумкин эмас эди. Инсоният табиий оламга ўз муносабатини билдирганда ва табиий оламни кундалик турмушига боғлаганда, булар унинг эстетик эҳтиёжини қондирадиган омил бўлиб хизмат қилди. Бунга қўшимча равишда эстетик эҳтиёжни қондириш воситаси сифатида санъатдан ҳам фойдаланди. Инсоният аслида ўз дунёқараши, табиатдаги буюмларга, ҳодисаларга бўлган муносабати ифодаси сифатида бадиий тафаккурни шакллантириди. Шу боис айтиш мумкинки, ёзма адабиётга қадар инсонда бадиий мушоҳада қилиш лаёқати шаклланди, табиатдан, ҳодисалардан, ўзи яратган буюмлардан завқланиш ҳисси пайдо бўлди.

Фақат шугина эмас. Инсониятнинг тафаккури кўп нарсага қодирлигини ва жуда кўплаб мерос яратганини тарих яхши билади. Инсониятнинг тафаккури яратган ҳамма нарса, биринчи навбатда, бизнинг маънавий

меросимиз. Зотан, Президентимиз И.А.Каримов “Юксак маънавият – енгилмас куч” асарида бугунги кунда маънавиятилизни шакллантирадиган ва унга таъсир ўтказадиган барча омил ва мезонлар тўгрисида сўз юритар эканлар: “Албатта, ҳар қайси халқ ёки миллатнинг маънавиятини унинг тарихи, ўзига хос урфодат ва анъаналари, ҳаётий қадриятларидан айри ҳолда тасаввур этиб бўлмайди. Бу борада, табиийки, **маънавий мерос, маданий бойликлар, кўхна тарихий ёдгорликлар** энг муҳим омиллардан бири бўлиб хизмат қиласди”, деб таъкидладилар. Қадим халқ оғзаки ижоди, ёзма адабиёт бизнинг маънавий меросимиздир.

Адабиёт ўз тараққиёти давомида маълум бир мақсадни кўзлаган ҳолда мифлардан фойдаланиб келган. Айнан ғайритабиий тимсоллар анъанавий мифлар заминида пайдо бўлганини таъкидлашимиз даркор (ғайритабиий тимсолларга мифология асос бўлгани учун, биз ғайритабиий тимсоллар ва мифологик тимсоллар терминини баравар ишлатамиз). Инсоният яратган ғайритабиий тимсоллар, сюжетлар, тасодифлардан холи бўлиб, узоқ асрлик бадиий тафаккурнинг маҳсулидир.

Ғайритабиий тимсолларга ҳамма даврда ҳам бирдай ёндашилган эмас. Бу тимсоллар исломгача бўлган ёзма адабиётда бевосита ва билвосита асос вазифасини ўтаган бўлса, мумтоз адабиётда ижодкорлар ғайритабиий тимсолларга ижодий ёндашилар, бу тимсоллардан маълум бир мақсадда фойдаландилар. Туркий халқлар, хусусан, Сибирь туркий халқлари оғзаки ижодида эса ғайритабиий тимсолларнинг барқарор, қадимий хусусиятларини ўзида саклаган ҳолатини кўрамиз.

ХХ аср модернизмидаги мифологиянинг мақсади ўзгарди, ижодкорлар мифологияга онгли равишда ёндашдилар. Жумладан, Ж.Жойс, Кафка, Маркес ва бошқа кўплаб модернчи ёзувчилар мифологияга мурожаат этганларида шуни кўриш мумкин.

Ибтидоий ёки қадимги мифларнинг пайдо бўлиш жараёнида ҳам худди ХХ асрдаги мифологияга буюк ижодкорларнинг муносабатига монанд жараённи кўрса бўлади. У даврда ҳам инсоният мифларни яратишганда ва уларга мурожаат этганда маълум бир мақсадни кўзлаган: инсоният “умумлаштиришга, тасниф ва таҳлилга лаёқати, интеллектуал кучи борлигини, буларсиз қадимги маданият мазмунсиз бўлиши”,¹ мумкинлигига ана шу воситалар ва омиллар орқали гувоҳ бўламиз.

Ғайритабиий тимсоллар ва мифология ўзаро зич боғланган, бири иккинчисиз бўлиши мумкин эмас. Шу боис мифологик образлар билан ғайритабиий тимсоллар ўртасига тенглик аломатини қўйиш мумкин. Мифологик образлар шуниси билан диққатга сазоворки, уларда ибтидоий фикрлашнинг ҳар қандай тури – мантиқий фикрлаш ҳам, бадиий фикрлар ҳам, аниқ ва мавхум фикрлаш ҳам акс этади. Ибтидоий фикрлаш босқичи эса, ўз навбатида, ибтидоий инсоннинг дунёқарашидан иборат. “Ибтидоий инсон ҳам ўзини табиий оламдан ажратиб олмаган, инсоний хусусиятларни табиий обьектларга кўчирган, уларга ўз ҳаётини, инсон ҳистойгуларини, онгли, маълум бир мақсадга йўналтирилган

¹ Мелетинский Е.М. Поэтика мифа. – Главная редакция восточной литературы. М.: 1976, С.158.

фаолиятини сингдирган”.¹ Бу қараш инсон атроф—мухитни шахслаштирган деганидир. Атроф-мухитни “шахслаштириш” орқали ибтидоий инонч-эътиқодлар – фетишизм, анимизм, тотемизм каби эътиқод ва қарашлар шаклланади, бу эса ғайритабиийликсиз бўлиши мумкин эмас. Ибтидоий даврда “одат”даги ҳолат бугунги кунда гайритабиийлик касб этади.

¹ Мелетинский Е.М.Юқоридаги асар, 164-165-бетлар.

I ФАСЛ

ИЛК БАДИЙ ТАФАККУРДА ИККИ ҚИЁФАЛИ МИФОЛОГИК ПЕРСОНАЖЛАР ВАЗИФАДОШЛИГИ

Инсоният азалдан ташқи таъсирларга берилувчан бўлган. Айниқса, ибтидоий ва қадимги даврлардаги инсониятнинг тафаккури, дунёқараши тарзида, оламни англаш мезонида ўзига хослик бор. Бу ўзига хослик маълум қонуниятга таянади. Қонуният шундан иборатки, инсон барча тасавурларини ташқи ҳодисалардан олган. Аммо буни онгли равишда қилмаган. Бу ҳодисани тушуниш ва англаш учун, табиат ва табиий ҳодисаларга ўз муносабатини билдириш ва буни табиий қонуният деб қараш сабаб бўлган. Бугун биз англаб тушунадиган “табиат”ни инсон ибтидоий даврда жуда яқиндан ҳис қилган, табиат қонуниятларини ўзига хос тарзда англаб етган. Соддароқ қилиб айтганда, табиат ҳодисалари билан ўзи ўртасидаги боғлиқлик мавжуд, деб билгани ҳолда, табиатни айнан ўз хатти-харакатларига кўчираверган.Faқат инсон ўзига тегишли бўлган, ўзи истаган нарсага муносабатини билдирган. “Шунинг учун ҳам овчилар учун ташқи табиат ҳайвонот олами билан бирлаштирилган”¹. Овчилар табиатга жуда яқин бўлгани учун ҳам ибтидоий тафаккур тарзини баҳолашда овчилар, бундан ташқари, шу тоифага яқин дехқонлар,

¹ Фрейденберг О.М. Миф и литература древности. – М.:Главная редакция восточной литературы. 1978. 19-бет.

чорвадорлар ва бошқа тоифа одамларнинг дунёқарашига таянамиз. Зотан, қадимий тасаввур ва тушунчалар, ибтидоий оламни англаш мезонлари кўпроқ ана шу тоифаларда сакланади ва дунё халқларининг ҳаммасига алоқадор бўлган қарашлардир. Бу қарашлар қандай шаклда бўлмасин, барибир, бадиий тафаккурнинг маҳсули ўлароқ юзага чиқади ва илмий адабиётларда “қолдик” (пережитки), “реликт” деган терминлар билан аталади. Аммо буни айрим олимлар айтиётгани сингари, “ақлий қолоқлик” деб қараш нотўғридир, бу ҳодисалар ибтидоий одамнинг фикрлаш тарзини, табиий ҳодисаларга муносабатини “илмий” асосда билдиришга уринишлари сифатида қаралиши керак.

Инсоният ҳаётида ғайритабиийликнинг келиб чиқиши, биринчи навбатда, кундалик ҳаётни табиат билан боғлагани, жамики табиатни жонли деб ишонишидадир. Ана шу босқичда миф пайдо бўлади. Ғайритабиийлик эса, асосан, мифнинг маҳсулидир. Ибтидоий инсон қабилалари учун қуёш ва ой, дарахтлар ва дарёлар, булат ва шамол жонли мавжудотлардир. Булар ҳам инсонлар ёки жонзотлар сингари мавжудотлардир. Бу объектлар инсон тасаввурида, уларнинг сунъий куроллари ёрдамида, жонзотлар сингари, маълум бир аъзолари ёрдамида бу оламда ўзларига юклатилган вазифаларни бажаради.¹

Хар қандай буюм ёки материал остида ҳам қандайдир ярми инсонга мансуб қўрқинчли маҳлук бўлиши мумкин. Бу маҳлук ҳамма нарсани – бўлғуси воқеа-ҳодисаларни,

¹ Тайлор Э.Б. Первобытная культура. – Москва: Издательство политической литературы, 1989, 129-бет.

жамиятни сўзлари, ҳатто нафаси ва бошқа хатти-ҳаракати билан ҳаракатга келтириши мумкин. Бу инсониятнинг ташқи олам билан алоқасини кўрсатади. Марказий Осиё ҳудудида яратилган тасвирий ва амалий санъат намуналарида, афсоналарда, эртак ва достонларда инсониятнинг ташқи оламга муносабатини кўрамиз. Фикримизнинг исботи сифатида Марказий Осиёнинг энг қадимги афсоналаридан айримларига, жумладан, Геродотнинг “Тарих” китобида сақланиб қолган скифлар тўғрисидаги афсоналарга мурожаат этамиз.

Геракл чорвасини ҳайдаб, ўша пайтда инсон оёғи етмаган юрга бориб қолган экан. (Ҳозир у ерларда скифлар яшайдилар.) Герион Понтадан узоқда – Океан оролида, Геракл Устунлари ортидаги Гадирда истиқомат қиласди (бу оролни эллинлар Эрития деб айтишади).

Эллинлар ҳикоя қилишларича Кун чиқишдан бошлаб, бутун Ер шари бўйлаб океан оқар экан. Лекин ўзлари ҳам буни аниқ исботлай олмайдилар. Шундай қилиб, Геракл ҳозирда Скифлар мамлакати деб айтиладиган жойга ўша ёқдан келиб қолган экан. У ерда Геракл бўрон, совукقا деч келиб қолибди. У отларини ўтлатгани қўйиб юборибди ва ўзи *тўнгиз терисига* (таъкид бизники – Ҳ.А.) ўраниб ухлаб қолибди. Бу пайтда унинг отлари сирли равишда ғойиб бўлибди.

Геракл уйғониб, отларини излашга тушибди ва бутун мамлакатларни кезиб чиқибди. Нихоят, Гилай деган юрга келибди. У ерда бир гор бор экан. Горда у ярми аёл, ярми илон бўлган (таъкид бизники – Ҳ.А.) аллақандай жонзотга дуч келибди. У жонзотнинг сағрисидан юқори кисми аёлга, пастки қисми илонга ўхшар экан...

Бундан кейинги воқеалар маълум: Геракл ўша жонзотнинг талабига кўра, унга уйланади ва ундан учта ўғил туғилади. Энг кичигининг исми Скиф бўлиб, Геракл қўйган шартни бажаради – унинг камонини тортади, камарини боғлайди ва Скифия шоҳи бўлади.

Гарчи Геродот скифларнинг пайдо бўлиши ҳақидаги учта афсонадан иккитасига (жумладан, бу афсонага ҳам) ишонмаслигини, фақат скифларнинг Ўрта Осиёдан келиб чиққани тўғрисидаги ривоятга (бу ривоят кўпроқ тарихийлик тамойилларига асосланган бўлиб, барча воқеалар маълум аниқ географик шароитда ва аниқ тарихий қавмлар ўртасида юз беради) ишонишини асарида айтиб ўтган бўлса ҳам, биз учун мазкур афсонадаги ярми илон ва ярми одам бўлган жонзот тимсоли дикқатга сазовор. Бундан тарихий тамойилларни қидириб бўлмайди ва бу бизнинг мавзуга алоқадор ҳам эмас. Бу ўринда мазкур афсонадаги ярми илон, ярми аёл кўринишидаги жонзот дикқатга сазовор. Бундай жонзот ибтидоий тафаккур босқичи учун характерли ҳодиса. Бу тасвирни шундай талқин қилиш мумкин: ибтидоий инсон ҳайвонот олами билан қариндош эканига қатъий ишонар эдию, бу мавзудаги ҳамма “сюжет”ни ҳам ижоднинг мифик даври билан боғлайвермас эди, яъни инсоният мифик даврни ҳам одатдаги ҳол деб қараган. Чунки шундай тасаввурга эга бўлган инсон ибтидоий жамоанинг оддий аъзоси бўлган эди. Шу боис у жонзот билан қариндошлиқ алоқасига (яъни никоҳ алоқасига) киради ва бундан амалий натижага эришади: шу орқали уруғга асос солинади.

Худди шу хусусият болаларнинг ўйинлари жараёнида ўз ифодасини топади. Ўғил болалар ўз тасаввурида ёғоч отлар, стул ёки бирон ёғоч буюмлар воситасида қандайдир жонзотни ҳаракатга келтиради. Болаларнинг тасаввуридаги бу жараён илк мифологик даврни гавдалантиради. Ёки қиз болаларнинг кўғирчоқларини ҳам шунга мисол қилиб келтиришимиз мумкин. Кўғирчоқни болалар ўзларининг қиёфадоши сифатида тасаввур қиласидар, кўғирчоқларни ўзлари каби жонли деб, ўзларининг хатти-ҳаракатларини кўчирадилар (аллалаб “ухлатадилар”, овқат берадилар, кўғирчоқнинг “хафалигига”, “шодлигига” шерик бўладилар).

Энди юқоридаги афсонада келтирилган ярми илон, ярми жонзотга қайтамиз. Бу анъана факат Геродот келтирган афсоналардагина мавжуд эмас, балки шу мазмундаги туркий қавмлар яратган афсоналар ҳам бор. Бу ҳақда Н.Раҳмоновнинг ишларида айрим жиҳатлари айтиб ўтилган. У скифлар билан қадимги туркийларнинг уч қаватли олам модели ҳақида сўз юритиб, ҳар иккала халқнинг дунёқараши, оламни англаш мезонларидағи умумийликларнинг ибтидосини аниқлашга ҳаракат қилган ва бундан бошқа бир қатор омиллар орқали ҳар иккаласининг келиб чиқишини топишга эришган.¹ Скифлар ва туркий қавмлар алоқалари ҳақида сўз кетганда, уларнинг тотем анъаналари ҳақида сўз юритиш ўринлидир. Зотан, тотемистик образлар халқнинг қариндошлиқ алоқаларини белгилашда муҳим омиллардан ҳисобланади. Бизга қадимги туркий

¹ Қаранг: Раҳмонов Н.А.Орхоно-енисейские памятники и тюркские эпосы. АДД. – С.1991. 45-46.

қавмларнинг энг иуфузли ашин уруги бўридан келиб чиққани ҳақида афсона етиб келган. Бу ҳақда бир қатор илмий адабиётларда айтиб ўтилган.¹ Қадимги туркийларнинг “бўри авлодлари” деб ном олишига сабаб ҳам ана шу – хоқонлик тахтининг меросхўри ашин уруғининг бўридан пайдо бўлгани ҳақидаги афсонага ишорадир. Бу ўринда ўша афсонани келтирмаймиз-да, бу афсонага ҳамоҳанг, агар таъбир жоиз бўлса, келиб чиқиши бир бўлган бошқа халқлар афсона ва ривоятларига тўхталамиз. Зотан, халқларнинг ва қавмларнинг келиб чиқишидаги гайритабиийлик фақат қадимги туркийларда эмас, балки унга қўшни халқларда ҳам бор.

Геродот скифларнинг келиб чиқиши ҳақида афсонани келтирганда, ит бошли скифлар ва йилда бир марта бўрига айланадиган скифлар ҳақида ҳам айтиб ўтади.² Археологик топилмалар орасида ҳам бунга монанд материаллар кўп учрайди. Жумладан, инглиз олими Минис батафсил маълумот бериб, Сибирь скифлари жамиятидаги кўплаб рамзий образларни келтиради. Булар – Сибирь скифлари қабрларидаги бўри, скифлар тасвирий ва амалий санъатидаги йўлбарс ва ит образларидир. Шунингдек, бўри тимсолининг скиф ва туркий халқлардаги параллелиги шу билан чегараланмайди. Уйғурларнинг пайдо бўлиши ҳақидаги тотемистик

¹ Қаранг: Бичурин Н.Я. (Иакинф). Собрание сведений о народах, обитавших в Средней Азии в древние времена. Изд.Академии Наук СССР. – М.: 1950. – С. 221-222; Гумилев Л.Н. Древние тюрки. – М.: “Наука” Главная редакция восточной литературы, 1967. – С. 22; Раҳмон Н. Турк хоқонлиги. – Тошкент. Абдулла Қодирий номидаги халқ мероси нашриёти, 1993. 42-43-бетлар.

² Гасанов З. Царские скифы. – Нью Йорк, 2002. – 153.

мифда ҳам айнан бўри иштирок этади. Бу миф Вэй хонадони давридаги (227-264) Чин манбаларида сақланган. Уйурлар Чин манбаларида Као-чи деб юритилган бўлиб, “катта арава” деган маънони билдиради. Миф асосида шаклланган афсонанинг мазмуни қуйидагича:

Хун хоқонининг икки гўзал қизи бор эди. Хун амалдору алплари бу қизларни тангри каби хурмат қиласидилар. Хоқон “бундай гўзал қизларимни инсон боласига бермайман, мен уларни Кўк тангрига бағишлайман”, деб ваъда берди. Бешбалиқнинг шимолида катта сарой қурдирди ва қизларини у саройга беркитиб қўйди. Сўнгра “Тангirim, бу қизларни қабул эт!” деб тангрига ёлворди. Қалья атрофида бир бўри пайдо бўлди ва кечаю кундуз бу ерга келиб улий бошлади. Бўри бу ерда уч ой қолди. Ниҳоят, қальядаги икки қиздан бири иккинчисига, бу бўри Кўк тангри томонидан юборилган, деб гапирди. Кейин у қиз қальядан ташқарига чиқиб, бўрига турмушга чиқди. Икковидан бир неча фарзандлар туғилди. Фарзандлар аста-секин кўпайиб, Као-чи қабиласини пайдо қилди. Шунинг учун бу қавм яратган куйлар бўрининг улушига ўхшайди.

Шубҳасиз, Ашин уруғининг келиб чиққани тўғрисидаги афсона билан Као-чи қавмининг келиб чиқиши ҳақидаги афсонанинг замини битта мифга – туркий қавмларнинг келиб чиқиши ҳақидаги мифга бориб тақалади,¹ зотан Ашин уруғининг келиб чиқиши ҳақидаги афсона ва Као-чи, яъни уйгур қавмининг келиб чиқиши

¹ Hüseyin Namık Orkun. Eski Türk Yazıtları. – Ankara. 1987. – S.223-224.

ҳақидағи афсона Таншу ва Сүйшу йилномаларида ёзіб қолдирилган.

Бу деталлар ёки тимсолларни поэтик уйдирма ё бўлмаса поэтик метафора деб торайтириш ўринли эмас, балки бу тимсол табиат фалсафасига таянади. Гарчи ибтидоий ва ғализ бўлса ҳам, фикр тўлиқ, жиддий қабул қилинадиган реал ҳодиса сифатида тушунилади¹. Ярми инсон ва ярми илон бўлган аёл жинси, яъни жонзот – ибтидоий тафаккур маҳсули эканлиги билангина диққатга сазовор эмас, балки ҳайвонот олами билан уйғунлик касб этгани ва ибтидоий инсон тафаккури учун бу табиий ҳодиса экани билан характерланади.

Дунё халқлари фольклорида “овчилик сюжетлари” бор. Бу “сюжетлар” тасвирий санъатда ҳам, мифларда ҳам ўз изини қолдирган. “Овчилик сюжетлари” энг қадимиј сюжет бўлиб, табиатга, ҳайвонот оламига магик таъсир натижасида пайдо бўлган. Ярми инсон, ярми жонзотлар ана шу қадимиј “сюжет”нинг маҳсули. Дастлаб тасвирий ва амалий санъат маҳсули бўлган бу “сюжетлар” оғзаки ижодга, хусусан, сеҳрли эртакларга тасвирий санъат яратилган даврдаёқ ўтган. “Уруғлар, аждодлар тўғрисидаги мифологик сюжетларни ўзида гавдалантирган”² бу тасвирлар инсоният илк бадији тафаккури магик жараёндан иборат эканини далиллайди.

Азалдан инсон ва табиатнинг ўзаро уйғунлиги, инсоният томонидан табиий оламнинг реал ҳолатда қабул қилингани “инсон + табиий олам” тушунчасини бир

¹ Тайлор Э.Б. Юқоридаги асар, 130-бет.

² Тројков П.А. Промысловая и магическая функция сказывания сказок у хакасов. – Советская этнография, 1969. №2. С.28-29.

нуктада қарашга сабаб бўлди. Фикримизнинг далили учун Қаюмарс афсонасига мурожаат этайлик.

Қаюмарс ҳақида Берунийнинг “Ўтмиш халқлардан қолган ёдгорликлар” асарида батафсил маълумот берилади. “[Эронликлар] оламнинг бощланиши, Ахраман, яъни иблиснинг худо оламни фикр қилиб, унга ажабланганидан туғилиши ва Қаюмарс ҳақида кўплаб ажойиб гаплар айтганлар. [Улар шундай дейди]: тангри Ахраман иши хусусида ҳайрон бўлиб пешонаси терлади, у терни сидириб ташлаган эди, ундан Қаюмарс пайдо бўлди. Тангри уни Ахраманга қарши юборди, у Ахраманни енгиб миниб олди ва унинг [устида] оламни айлантиришга тушди. Ниҳоят, Ахраман Қаюмарсдан энг ёмон кўрадиган ва энг кўрқинчли нарсасини сўради. Қаюмарс унга жаҳаннам дарвозасига етганда қаттиқ кўрқишини айтди. Ахраман [жаҳаннам дарвозасига] етгач, ҳийла қилиб ўйноқлай бошлади, охир Қаюмарс унинг устидан йиқилиб тушди. Ахраман унинг устига чиқиб олди ва Қаюмарсдан: “Қайси томонингдан ейишга бошлай?” – деб сўради. Қаюмарс ўзининг айтганига Ахраманнинг муҳолиф бўлишини билиб: “Оёқ томондан ейишга бошлагин, олам ҳуснини бир муддат кўриб турай”, – деди. Ахраман уни бош томондан ейишга бошлаб, moyигига ва эрлик уруғи идиши (турадиган) жойга етганда, ундан икки томчи эрлик суви ерга томди-да, ердан икки туп ровоч кўкариб чиқди ва ровочлар ўртасида Мишо ва Мишона туғилди. Бу иккиси [эрлонликлар наздида] Одам ва Ҳаво ўрнида бўлиб, уларни Малҳий ва Малҳиёна ҳам дейдилар. Хоразм

оташпаратлари уларни Мард ва Мардона деб атайдилар”.¹

Бу афсонавий шахснинг турли тарихий манбалардаги баёни тўғрисида Беруний чуқур таҳлиллар олиб борар экан, Қаюмарс тарихи ҳақида Абу Ҳасан Озархур, Муҳаммад ал-Балхий ва бошқа қатор Эрон манбаларидаги маълумотларни солиштиради, ер юзидағи биринчи инсон сифатида кўрсатиб, унинг яратилиши билан боғлиқ маълумотлар қанчалик аниқ ёки ўзгача эканлиги ҳақида айтади. Беруний келтирган турли манбаларда Қаюмарс гоҳ “Гилшоҳ”(балчик шоҳ), гоҳ “Гиршоҳ” (тоғ шоҳи) деб талқин қилинади.²

Қаюмарс ҳақидаги афсона Хоразм заминида ҳам ёйилган бўлиб, машҳур археолог С.П.Толстовнинг бу ҳақдаги кузатишлари диққатга сазовордир. С.П.Толстов “Авесто”даги ва паҳлавий афсоналаридаги Айрданем-вэжо билан боғлиқ бир қатор анъалаларга диққатни жалб қиласди. Айрданем-вэжо “Қаюмарс” исмининг қадимги паҳлавий ва “Авесто”даги номидир. С.П.Толстов Xўжайли яқинидаги Жумарт қассоб деган тепаликни ана шу Айрданем-вэжо, яъни Қаюмарс билан боғлайди. Олим Жўмарт қассоб тепалиги атрофидаги жой номлари ва киши исмларини бир-бирига боғлиқликда олиб қараб, Тавротдаги Шимшўн, Сиф каби қаҳрамонларни ҳам Қаюмарс билан алоқадор деб билади ва шундай хулосага келади: “Шубҳасиз, бу ёдгорлик ва ҳаробалар комплекси қадимги Эрон афсонавий қаҳрамони Гавомард – Қаюмарс

¹ Абу Райхон Беруний. Танланган асарлар. 1-жилд. – Тошкент: “Фан” нашриёти, 1968. 127-128-бетлар.

² Қаранг: Абу Райхон Беруний. Танланган асарлар, 127-128-бетлар.

(Жумарт, Жумурт) билан бөглиkdir. Бу қаҳрамон Айрыйанем-вэжода буқа билан ассоциация қилинади. (К.В.Тревернинг фикрича, *Гавомарт* сўзи “буқа –одам деган маънени билдиради; буқа унинг йўлдоши бўлган”)¹

Н.М.Маллаев ҳам Қаюмарснинг ғайритабии қиёфаси тўғрисида К.В.Треверга ҳамоҳанг фикри айтган².

Нафақат маълум бир афсонавий шахслар, балки бутун бошли халқ ҳам ғайритабии қиёфага эга бўлиши мумкин. Бизнингча, бутун халқнинг ғайритабии қиёфасини метафорик тасвир деб қарааш мақсадга мувофиқдир. Бундай ҳолатни цивилизациялашмаган халқлар ҳаётида кўриш мумкин. Масалан, XIX асрда ҳам бирма халқини ит-одамлар деб тасвирлаганлар.³ Марко Поло Андаман ороллари аҳолисини бошлари итсимон ёввойи одамхўрлар деб тасвирланган эди.⁴ Шунингдек, яна бир кўрқинчли халқ – блемми халқини Плинний деган этнограф бошсиз деб, оғзи, кўзлари эса кўкрагида жойлашган дея тасвирланган эди. Бу тасаввур-тушунчалар ибтидоий даврга эмас, балки XIX асрда Шимолий Америкада истиқомат қилган ва цивилизациялашмаган халқларга тегишли. Чамаси, цивилазациялашмаган, бошқа халқларнинг таъсири кучли таъсир этмагани учун ҳам бу халқларда қадимий тафаккур тарзи сақланиб қолган бўлса, эҳтимол.

¹ Толстов С.П. Қадимги Хоразм маданиятини излаб... – Тошкент: Фан, 1964. 95-бет.

² Маллаев Н.М. Ўзбек адабиёти тарихи. – Тошкент, 1965. 48-49-бетлар.

³ Тайлор Э.Б. Юқоридаги асар, 190-бет. ,

⁴ Тайлор Э.Б. Юқоридаги асар, 190-бет.

Инсон бош қисмининг ҳайвонот усулида тасвиrlангани шундан далолат берадики, бу ҳодиса типологик хусусиятга эга бўлиб, ҳалқнинг ионч-эътиқодлари билан бирга, турмуш тарзи ҳам бу даврга келиб мифологик мазмун касб этадиган бўлди. Ярми инсон, ярми ҳайвон қиёфасидаги жонзотлар тасвирини архаик мифологиянинг реликтлари сифатида қараш керак бўлади. Бу тасвиrlар архаик мифология заминида шаклланган эртак ёки афсонанинг маҳсулни бўлиши мумкинлигини таъкидламоқчимиз. Туркий ҳалқлар бадиий тафаккури тарихида бундай тасвирининг ёркин намуналарини кузатамиз.

Турк-мўғул ва саян-олтой мифологиясида Эрклик образи кенг тарқалган. У ўликлар диёри ҳукмдори, нариги оламнинг олий ҳаками, иблис, демиург ёки демиург яратган илк жонли мавжудот. Бу исм “Олтин ёруғ”да буддавийлик ақидасининг ҳомийси, бу ақиданинг ёювчиси сифатида талқин қилинади ва Эрклик хоқон деб ҳам номланиб, “кудратли ҳукмдор” маъносини билдиради. Аввал Эрклик хон ҳақидаги афсонага тўхталиб, сўнgra “Олтин ёруғ”даги тимсолига тўхталамиз.

Буддавийлик афсоналарига кўра, ўтмишда Эрклик рухоний бўлган ва авлиёликнинг энг юқори даражасига эришган. Аммо у ўғирликда айбланиб, ё қатл қилинган, ёки талончиларнинг жиноятларига беихтиёр гувоҳ бўлган, Шу сабабдан ўша жиноятчилар томонидан ўлдирилган. Эрклик хоқоннинг боши олинган бўлса ҳам, танаси тириклигича қолган ва боши ўрнига ҳўқизнинг калласини ўрнатиб олган. Оқибатда у қўрқинчли ва

ҳалокатга олиб борувчи иблицга айланиб қолган. Уни “ўлим ғолиби” Ямандаг (санскритча Ямандага) ўғирлаб, ер ости оламига жўнатиб юборган. Эрклик ер ости оламида ўша оламнинг ҳукмдори ва ҳаками вазифасида бўлган. Мўғулистонда Эрклик ва Ямантака бир хилда тасвиранади.

“Олтин ёруғ”да ҳикоя қилинишича, Ку тай вафот этганда, унинг оламда қилган гуноҳлари – қизининг тўйида ҳайвонларни сўйиб, қурбонлик қилгани учун, нариги оламга Эрклик хоннинг ҳузурига уни тўртта рух ҳукмга олиб боради. “Эй инсон! Сен иссиқ жон(ини) олганлардан ўттиздан ортиги – боғланган, ушланган жонзотлар алоҳида қудратли Эрклиг хоннинг қаршисида душманлик кўзини чақчайтириб, ўша кўзлари билан сени кутиб турурлар. Қачон у ерга борсанг, Эрклиг хон жуда қаттиқ қийнаб ўлдирилганларнинг қаттиқ қонуни остида ...у ердаги оғир (азоблардан) қутулмагайсан”, дея сўзладилар”. Бундан кейинги воқеалар ўз оқими билан давом этади: Ку тай қилган гуноҳлари учун тавба қилиб, “Олтин рангли, ёруғ, ялтироқ, ҳамма (нарса)дан устун турадиган нўм подшоҳи номли нўм битиги”ни кўчириш учун Эрклиг хонга ваъда беради ва тирилади.

“Олтин ёруғ”да Эрклик хоннинг ғайритабии қиёфаси тасвиранмайди ёки бу ҳақда ишора ҳам йўқ. Бунинг сабаби шуки, Эрклик хон ҳақидаги турк-мўғул афсоналарида унинг ғайритабии қиёфаси сақланиб қолган. “Олтин ёруғ”дан келтирилган афсонадан маълум бўлишича, у ўлим худоси, эмас, балки жонзотларни

асрайдиган, гуноҳлари учун жонзотларни тавбага олиб келадиган ер ости олами худосидир.

Эрклик хоннинг ҳўқиз бошли қиёфада тасвиirlаниши тотемизмнинг маҳсули ўлароқ юзага келганлигини шу ўринда такрорлаш лозим. Тотемизм Марказий Осиёда энг қадимги культ сифатида мавжуд. Эрклик хоннинг ҳўқиз калласи тасвиридан бошлаб унинг ер ости оламида жамики жонзотларни ҳимоя қилувчи худо эканига оид афсоналарга қадар тотемистик мифларнинг излари кўринади. Гарчи тотемистик миф Эрклиг хон билан боғлиқ афсонада ярқ этиб кўринмаса ҳам, тотемизмнинг қолдиқлар борлигини эътироф этишимиз керак. Зотан, “тотемистик мифлар ўзида фантастик тотемистик аждодлар ҳақидаги афсоналарни гавдалантиради” ва мазкур мифларда “одатда, бу аждодларнинг саёҳатлари тўғрисида ҳикоя қилинади (улар, кўпинча, зооантроморфик мавжудотлар сифатида тасвиirlанади, аммо мифда инсон ҳақида сўз кетяптими ёки жонзотлар ҳақида сўз кетяптими – мифнинг мазмунидан бу англашилмайди)”.¹ Агар тотемистик мифларнинг ана шу қонунияти ва хусусиятидан келиб чиқилса ва шу нуқтаи назардан ёндашилса, “ҳўқиз бошли” Эрклик хон тўғрисидаги афсонада ҳам қадимги турк-мўгул тотемистик мифлари ётади.

Гап ҳўқиз билан боғлиқ тотемистик мифлар тўғрисида кетаётгани учун Қаюмарснинг ярми инсон ва ярми ҳўқиз қиёфаси тўғрисида эслатган ҳолда, бу жонзотнинг Шарқ халқлари мифологиясидаги роли тўғрисида тўхталиш

¹ Мифы народов мира. Энциклопедия. Том 2. – М.: 1992. 522-бет.

мақсадга мувофиқдир. Шундан сўнгнина мифологик фикрлашнинг ва бу мифологик образнинг моҳияти очилади.

Қадимги шумер, миср ва бошқа бир қатор шарқ халқларида ҳўқиз мифологик образи учрайди. Бу халқларнинг мифологик тасаввурига кўра, ҳўқиз худонинг заминдаги тажассумига ва унинг атрибутларига мос келади. Милоддан олдинги 3-2 минг йилликларда Ўрта Осиёда, хусусан, Туронзаминда, қадимги эрон ва ҳинд мифологиясида ҳўқиз, биринчи навбатда, Ой тангрисининг тимсоли эди. Хусусан, Эрон мифологиясида ой “ҳўқиз уруғига эга бўлган” деб, шумер ва аккад халқларида эса ой тангриси Син кўксоқолли ҳўқиз сифатида тасаввур қилинган. Шумерларнинг “Гилгамиш ва самовий ҳўқиз” қўшиғида маъбуда Иннин, ўзининг севгисига жавоб бермаган Гилгамишдан аччиқланиб, худолар самовий ҳўқиз яратсин ва мен учун Гилгамишдан қасос олсин, деб курашади ва мақсадига эришади. Ўша ҳўқиз осмондан Евфрат дарёсига тушиб, дарё сувини ичиб қўяди. Гилгамиш эса ҳўқизни мағлуб қиласи (шумерлар давридан бизгача етиб келган суратларда қахрамоннинг одамсимон ҳўқизга ўхшаш махлук билан олишув лавҳалари тасвиirlанган). Шу ўринда ярми буқа ва ярми инсон Қаюмарснинг Ахриман томонидан ўлдирилганини эслатиб ўтмоқчи эдик. Бу сингари сюжетлар крит, юон, угарит халқларининг қадимги мифларида ҳам бор бўлиб, улар асосан ҳўқиз билан олишувга оид удумлар билан боғланган.¹

Маълум бўладики, ҳўқиз билан боғлиқ сюжетлар ва тасвиirlарнинг мақсади турлича – қайси бир халқда ёвуз кучлар тимсоли сифатида тасвиirlанган бўлса, қайси бир

¹ Миғи народов мира. Энциклопедия. Том 1. – М.: 1992. 203 бет.

халқда тангри тимсоли сифатида фаолият күрсатади. Бу тасвири мәйн жиҳатдан гурухларга ажратиша айни ана шу хусусиятларига таянамиз. Зотан, турли халқларда хўқиз мифологик образи билан боғлиқ сюжетни келтиришимиздан мақсад шуки, бу тимсол турли халқларда бир-бирига боғлиқ, бир манбадан келиб чиқсан деган фикрдан узоқмиз. Бу ўринда бизни қизиқтирадиган ва бевосита мавзумизга алоқадор бўлган ҳамда тангри тимсолини ўзида мужассамлантириши жиҳатидан яқин бўлгани учун, Қаюмарс, Эрклик хон ва Эрон мифологиясидаги хўқиз тимсолининг зоонтроморфик хусусияти ҳакида айrim мулоҳазаларимизни айтиб ўтмоқчи эдик.

Хўқиз тимсолининг ибтидоси Ўрта Осиё ва Эрон халқларида тангри, яъни маъбуда билан боғлиқ экан, бунинг асослари бу ўлкалардаги диний оқимларнинг умумийлигига таянади. Бу ўринда Эрклик хоннинг бош қисми хўқиз тимсолида экани ва унинг Қаюмарс афсонасидаги хўқиз тимсоли билан қанчалик алоқадорлигига эътибор қаратишимиш лозим. Қаюмарс, Эрклик хон афсоналаридаги хўқиз тимсоли бир манбадан эканлигини айтиб ўтишимиз лозим. Рим империяси даврида бутун Шарқий ва Фарбий Европада, Яқин Шарқда, хуллас, қаерда рим армияси қароргоҳ ўрнатган бўлса, ўша жойларда ибодатхоналар курилган, бу ибодатхоналарда ханжар билан хўқизни ўлдираётган Митра тасвиrlанган барельеф ёки ҳайкал асосий ўринда турган. Бу хўқизни Ахурамазда биринчи қурбонлик қилинадиган жонзот сифатида яратган эди.¹

¹ Кузнецов Б.И. Бон и маздаизм. – Евразия, Санкт-Петербург, 2001. – С.143.

ҚАДИМГИ САНЬАТ АСАРЛАРИДА ИККИ ҚИЁФАЛИ ТАСВИРЛАР ВА УЛАРНИНГ МИФОЛОГИК АСОСЛАРИ

Инсониятнинг табиий олам билан бирлигини ва табиатдаги ҳодисалар, жонзотлар билан ўз фаолиятини уйғунлаштирганини, яъни бир “қолип”га солганини механик ҳодиса сифатида қарааш керак, деб ҳукм чиқариш ҳам бир ёқламадир. Чунки бу ибтидоий даврдаги билимнинг ўзига хос намунаси, зотан, “билим культта мансуб, билим мансуб бўлган умумий шакл эса ишончдир...”¹ Инсониятнинг борлиққа ишончи ва ундан ниманидир излаши натижаси ўлароқ юзага келган тушунчалар, тасаввурлар тимсоллар воситасида ибтидоий инсон ўз онгидаги ҳаётини ҳақиқатни кашф этади. Ибтидоий инсон тасаввуридаги ҳаётини ҳақиқатнинг тимсоллари тасвирий ва амалий санъат намуналарида, эртакларда, умуман, халқ оғзаки ижодининг ҳар қандай турида ўз қиёфасини намоён этади. Бу фикрларнинг тасдиғи сифатида Марказий Осиёдан тасвирий ва амалий санъатнинг энг қадимги намуналарига мурожаат этамиз. Тасвирий ва амалий санъат намуналари бадиий тафаккурнинг маҳсули ўлароқ, ғайритабиий тимсоллар ифодасида айни халқ оғзаки ижодига ва илк ёзма адабиётга ҳамоҳангдир.

Марказий Осиёдан топилган санъат асарлари, уйрўзгор буюмлари, иш қуроллари, девор суратлари, қояларга ўйилган ёки ёғочларга ишланган ва бошқа қатор

¹ Гегель. Философия религии. М.: «Мысль», 1976, 371-бет.

намуналари орасида икки қиёфали тасвиirlар бор. Ёзма матн ёки халқ оғзаки ижоди, хусусан, сехрли эртаклар, афсоналар билан юқорида биз айтиб ўтган санъат асарларидаги тасвиirlарнинг моҳияти ва мазмуни бирбирига яқиндир. Зотан, икки қиёфали тасвир санъат асарида бўладими ёки матнда бўладими, барибир, бир мазмундаги мифологик образ бўлиб, “бу мифологик образ учун полисемантизм, яъни образларнинг мазманий ўхшашлиги деб аталадиган тасаввурлар характерлидир. Бу ҳодиса субъект ва объектнинг, билиб бўладиган олам билан бу оламни биладиган инсоннинг яхлитлиги билан изоҳланарди. Оламни мифологик ўзлаштиришни пайдо қиласиган конкрет фикрлаш шундан иборат эди, инсон буюмларни ва ҳодисаларни фақат яккаликда, умумлаштиришларсиз, уларнинг ташқи, жисмоний мавжудлиги билан, уларнинг сифатига ёриб киришларсиз тасаввур қила олар эди. Биз бундай мифологик тасаввурларни “”образлар” деб атаемиз... Илгариги мифологик фикрлашда буюмнинг “хусусияти” жонли мавжудот, шу буюмнинг қиёфадоши сифатида фикр қилинган эди”.¹ Шу нуқтаи назардан баҳоланса, тасвирий санъатдаги икки қиёфали жонзотлар халқ оғзаки ижоди ва ёзма адабиётдаги гайритабиий тимсолларнинг ўрнини босади ва эстетик эҳтиёжни қондиради.

Марказий Осиёning барча худудларида – Жанубий Сибирь, Мўгулистон, Ўрта Осиё худудларида топилган санъат намуналари “скиф-сибирь санъатида ҳайвонот усули”, “скиф ҳайвонот усули” каби терминлар билан

¹ Фрейденберг О.М. Миф и литература древности. – “Наука”, 1978. – С.182.

юритилади. Биз санъатдаги бу усулга эътибор беришимиизга сабаб – мифлар, халқ оғзаки ижоди ва илк ёзма адабиётдаги ғайритабиий тимсоллар билан санъатдаги бу сингари тимсоллар бир-бирини тўлдиради, бадиий фикрлаш ҳар иккаласида ҳам бир хил тарзда намоён бўлади. Санъатдаги бу тасвиirlар қадимги туркий қавмларнинг бадиий тафаккур имкониятларини ҳам кўрсатади. Қолаверса, бу усулнинг санъатда узок асрлар давомида қўлланиб келгани ҳам инсониятнинг, хусусан, қадимги туркийларнинг эстетик тафаккури ривожига ҳам бир далилдир.

Шуниси ҳам борки, бу муаммо юзасидан бир қатор ишлар амалга оширилган ва бир қанча нуқтаи назар бўлишига қарамай, Дунайдан тортиб Ўрдусгача чўзилган чўл зонасида истиқомат қилган халқларда скиф-сибирь “ҳайвонот усули”нинг келиб чиқиши ва унинг тасвирий ҳамда амалий санъатдаги кўринишлари ҳақида китоблар мақолалар бор бўлишига қарамасдан, масала ҳанузгача мунозаралилигича қолмокда¹. Ўзбекистонда скиф-сибирь ҳайвонот усули ҳақида Н.Рахмоновнинг айrim кузатишлари бор.² У қадимги туркий ёзма ёдгорликларда ва “Ўғузнома” достонида скиф-сибирь ҳайвонот усулининг ўзаро генетик боғлиқлиги жиҳатлари,

¹ Маннай-оол М.Х. К вопросу о происхождении скифо-сибирского “звериного стиля”. – Новые исследования Тувы №3, 2009; Толстов С.П., Итина М.А. Саки низовьев Сырдарьи. СА, 1966, №2. – С. 151–175; Киселев С.В. Древняя история Южной Сибири. – М., 1951; Руденко С.И. Культура населения горного Алтая в скифское время. – М.Л., 1953; Руденко С.И. Культура населения Центрального Алтая в скифское время. – М.-Л., 1960.

² Рахмонов Н.А. Орхено-еnisейские памятники и тюрксие эпосы. АДД. Ташкент, 1991. – С.45.

жумладан, ҳар иккаласида ҳам уч қаватли олам модели ифодалангани ҳақида сўз юритиб, қадимги туркларнинг тасаввури айнан скиф-сибирь ҳайвонот усули асосида пайдо бўлганини далиллашга ҳаракат қилган. Шуниси дикқатга сазоворки, Н.Раҳмонов скиф-сибирь ҳайвонот усули фақат санъатда эмас, балки ёзма адабиётда ҳам ўз изини қолдирганини далиллашга уринган ва мафкура, дунёқарашнинг яхлитлиги бу усулнинг санъатда ва адабиётда деярли бирлигини кўрсата олган. Бу ёдгорликлардаги мифологик образларнинг умумийлиги ёки тарихий қаҳрамонларни идеаллаштириш ё уларга мифологик мазмун юклаш орқали олам моделини қадимги турклар ва скифлар қанчалик аниқ тасаввур қилганлари ҳақида ўз қарашларини илгари сурган. Шубҳасиз, қадимги туркийлар ва скифларнинг олам модели ҳақидаги тасаввурларининг умумийлиги уларнинг қариндошлигини белгиловчи омиллардан бири экани тўғрисида бугун мулоҳазаларни айтиш мумкин.

Скиф-сибирь ҳайвонот усулида айрим рамзий образлар “кўчиб юриши” натижасида Европага ҳам тарқалган.

Скиф-сибирь ҳайвонот усулида ясалган олтин ва кумуш буюмлар орасида ғайритабии тимсолларнинг Марказий Осиёдаги ёдгорликларда кузатилиши алоҳида эътиборни тортади. Ўтган асрнинг 60-70-йилларида скифологияга бўлган қизиқиш қадимий тасвирий санъат асарларини тизимли ҳолда ўрганишга олиб келди ва маҳсус конференция ҳам ўтказилди. Бу конференция материаллари алоҳида тўплам ҳолида босилиб чиқди.¹

¹ Проблемы скифской археологии. – М, 1971.

Мутахассислар Осиё ва Европанинг кўп ҳудудларидан топилган археологик ёдгорликлар мисолида скиф-ҳайвонот усулида бажарилган санъат науналарини таҳлил қилдилар. Лекин Ўрта Осиё скиф-ҳайвонот усулида бажарилган санъат намуналари эътибордан четда қолганини шу ўринда эслатиб ўтиш ўринлидир.

Тўпламдан ўрин олган мақолалар орасида машҳур археолог М.И.Артомоновнинг санъатдаги “скиф-сибирь ҳайвонот усули”га бағишлиланган мақоласи ғоят аҳамиятлидир. У мазкур усул ҳақида сўз юритар экан, бу усул маълум бир этник гурухга эмас, балки милоддан олдинги биринчи минг йилликда турли ирқларга ва турли тилларда сўзлашувчи халқларга мансублиги тўғрисида ўз мулоҳазаларини ўртага ташлайди.¹ Шубҳасиз, санъатдаги бир турли этник гурухга мансуб усул бошқа халқларга ҳам тарқалганда, уларнинг турмуш тарзи, хўжалик юритишининг умумийлиги, бир хилдаги жамият қурилиши ва ўхшаш мафкураси муҳим роль ўйнайди. М.И.Артомонов скиф-сибирь ҳайвонот усулининг ilk бор пайдо бўлишида Шимолий Эрон қабилалари асосий мавқени эгаллагани тўғрисида гапирадики, бу фикр ўрганилаётган мавзу ва қўйилган масалани ҳал қилишда объектив хulosалар чиқариш учун етарли далилларни бермаслиги мумкин. Биз Эрон ва скиф-ҳайвонот усули тарқалган ҳудудларнинг халқлари билан тарихий-этник муносабатларга тўхталмаймиз, чунки бу алоҳида мавзу. Бизнинг асосий объективиз тасвирий ва амалий санъатдаги алоҳида усулнинг остида ётган мифологик

¹ Артомонов М.И. Скифо-сибирское искусство звериного стиля. – “Проблемы скифской археологии” тўпламида. – М, 1974. 24-бет.

мазмун бўлгани учун, масалага ўрни-ўрни билан тўхталиб ўтамиз.

Скиф-сибиръ ҳайвонот усули амалий жиҳатдан кундалик ҳаётда кўлланадиган буюмлар – иш қуроллари, уй-рўзғор буюмлари, тақинчоқлар, кийимларда ўз аксини топган. Шунингдек, девор суратлари ва амалий санъат намуналари орасида ҳам скиф-сибиръ ҳайвонот усулида бажарилганлари кўпчиликни ташкил қиласиди. Биз скиф-сибиръ ҳайвонот усулини ҳудудий жиҳатдан эмас, балки бу усулнинг Марказий Осиё ва ундан ташқари, ҳудудидаги умумий хусусиятларига, жумладан, тасвиrlанаётган парранда ёки ҳайвонларнинг ғайритабиий тасвирига таяниб ўрганиш тарафдоримиз. Зотан, бу усулда мифологик тасаввурларга асосланган мифологик фикрлаш Марказий Осиё ҳудудидаги этник гуруҳларнинг қариндошлигига ҳам далиллардан бири бўла олади. Ғайритабиий ҳайвонлар, паррандалар культи мифологик фикрлашга замин бўлган.

Кўп тарқалган тасвирий санъат асарлари орасида қанотли от, қанотли түя ва бошқа қатор ғайритабиий қанотга эга бўлган жонзотлар кўп учрайди. “Амударё хазинаси” туркумига кирган санъат асарлари орасида ғайритабиий жонзотлар тасвири учрайди.

“Амударё хазинаси”га мансуб ёдгорликлар, маълумотларга қараганда, Ахмонийлар даврига оид бўлиб, милоддан олдинги IV-II асрларга тегишли. Бу хазинага мансуб буюмлар орасида дастаги шеърнинг калла қисми ва орқа томони олтиндан қилинган кўза, икки қанотли грифон гавдаси шаклидаги билагузук, фантастик Гопатшоҳ –танаси ҳўқиз, бош қисми соқолли

одам бўлган тасвирлар ҳам диққатга сазовор (куйидаги суратларга қаранг).



“Амударё хазинаси”даги скиф-сибирь ҳайвонот усулига ҳамоҳангликни – шаклан ва мазмунан яқинликни Хоразм ва Термиз атрофларидан топилган ёдгорликларда ҳам кўрамиз. Куйида ҳар бир ғайритабиий жонзот тимсолини алоҳида алоҳида кўриб чиқамиз.

Қанотли от тимсоли. Бу ғайритабиий тасвир кенгроқ тарқалган. Шулардан бири милоддан олдинги III-II асрларга оид Кўйқирилган қалъадан топилган сувдонга ишланган (афсуски, сувдон иккига парчаланган) тасвиридир. Сувдон парчаларининг биттасида қанотли отнинг учишга тайёрланаётган ҳолати, иккинчисида скиф кийими даги жангчининг қанотли, аммо орқа оёқлари йўқ отда жангта кираётган вазияти тасвиранган.¹ От тасвиридаги бу ғайритабиийлик ҳайкалтарошнинг маҳорати эмас, балки унинг анъанавий дунёқарашининг санъатдаги алоҳида ифодасидир, буни диний дунёқарашнинг ўзи билан боғлаш бирёқлама бўлади. Бу

¹ Пугаченкова Г.А., Ремпель Л.И. История искусств Узбекистана. “Искусство”. – М.: 1965, 37-сурат.

ўринда от қаҳрамонлик рамзи эканига ишорадир. Бу фикримизга “Алпомиши” достонида Алпомишнинг оти тасвири мисол бўла олади. Достоннинг қўнғирот версиясида Алпомишнинг оти қанотли қилиб тасвирланади. Фозил Йўлдош ижросидаги “Алпомиши”да эса қанотнинг ўрнига “кўйруғи қирқ қулоч” от тасвирланади. От кўйругини зинданга солиб, Алпомишни зиндандан олиб чиқади.

Отнинг ғайритабии тасвири Марказий Осиёning бошқа ҳудудларидан ҳам топилган. Қозоғистоннинг Иссиқ қўргонидан топилган амалий санъат намуналарида учрайди. Иссиқ қўргони Қозоғистоннинг Олмаота шаҳри яқииидаги Иссиқ шаҳарчасида бўлиб, ўтган асрнинг 70-йилларида ilk бор ўрганилган. Ўша археологик объектдан топилган ёдгорликларни археолог К.А.Акишев алоҳида китоб ҳолида чоп эттирган.¹ Мазкур китобда топилган ёдгорликлар сурати берилган бўлиб, бизнинг тадқиқот объектимизга кирадиган ғайритабии тимсоллар орасида қанотли ва тог эчкисининг шоҳига ўхшаш шоҳи бор от алоҳида ўрин эгаллади.² Қанотли от ва чавандозлар тасвири камарнинг тўқасига ясалган. Давр жиҳатидан Кўйқирилган қалъадан топилган ёдгорлик, “Амударё хазинаси”дан топилган ёдгорликларга яқин – милоддан олдинги V-IV аср. Аммо ҳамма от тасвири ҳам қанотли эмас, транспорт воситасида ишлатиладиган от оддий: ё аравага қўшилган ёки югуриб кетаётган, ё бўлмаса, чавандоз миниб кетаётган ҳолатда

¹ Акишев К.А. Курган Иссык. – М.: “Искусство”, 1978.

² Ўша китоб, 24-саҳифадаги ва иловадаги 40-сурат.

тасвирланган.¹ Бу тасвирларнинг мифологик мазмунга алоқаси йўқ. Бу тасвирлар қанотли от тасвирига қараганда поэтик мазмун ифода этмайди. “Поэтик мазмун” тушунчаси шу ўринда қанотли от тасвирига нисбатан қўлланади. Поэтик мазмунни бўлиши учун мифологик мазмун ифода этиши лозим. Чунки қанотли от ёки бошқа қанотли жонзотлар тасвири мантикий фикрлаш доирасидан чиқиб, бадий мушоҳада даражасига кўтарилади. Бадий мушоҳада – бу образнинг мифологик мазмунин демакдир. Мифологик мазмун ҳам аслида от культидинг амалий томонидир. “Культ – бу ғайритабиийликка муносабат усулидир”.² От культидинг ғайрибатиий тимсоли юқорида мифологик мазмун ифодалashi ҳақида айтиб ўтдик, аммо қандай мифологик мазмун ифодалайди, деган савол туғилиши мумкин. Бизнингча, шундай: умуман, от Марказий Осиё халқарида муқаддас бўлгани учун одамлар худоларини ҳам отсиз тасаввур қила олмаганлар. Бу тасвир ёзма манбаларда қайд этилмагани учун қайси худоларга бағишланганини била олмасак–да, Тангри (осмон) культига бағишланган деган мулоҳазани айтишимиз мумкин. Одамлар осмон билан (шунингдек, бошқа худолар ва руҳлар билан) муносабатларида отни қурбон қилиш ижтимоий жамоа гурухи билан худо ўртасида боғловчи бўғин ҳисобланган.³ Ҳинд-эрон халқарида от культини Коинот тимсоли сифатида талқин қиладилар. Биринчи навбатда, қуёш худоларига мансуб бўлиб, маъно

¹ Акишев К.А. Ўша китоб, 68-саҳифадаги сурат.

² Нестеров С.П. Конь в культурах тюркоязычных племен Центральной Азии в эпоху средневековья. – Новосибирск. “Наука” СО, 1990. – С.8.

³ Нестеров С.П. Юқоридаги асар, 89-б.

томондан космогонияга боғланган. Бизнингча, қанотли от тасвири айнан қуёш худосига қурбонликни англатади.

Қадимги туркий қавмларда отни қурбонлик қилиш удумлари бор. Шу боисдан қанотли от тасвири билан одатдаги транспорт воситасида ишлатиладиган от тасвирида фарқ кескин бўлган.

Қанотли йўлбарс ва қанотли шер тимсоли. Иссик қўрғонидан топилган ёдгорликлар орасида қанотли йўлбарссимон йиртқич ҳайвон тасвири бор.¹ Нафақат тасвир жиҳатидан, балки мазмун ва моҳият жиҳатидан ҳам қанотли от билан бир. “Амударё хазинаси” топилмалари орасида ҳам қанотли йўлбарс тасвири, шунингдек, қанотли мушуксимонлар оиласига мансуб жонзот тасвири диққатга сазовор (пастдаги суратларга қаранг). Бундан ташқари, йўлбарснинг, грифнинг хонаки ҳайвонларники сингари шохи ҳам бор.² Қанотли йўлбарсни, юқоридагидай, ғайритабиий тимсол сифатида талқин қилишимиз табиий. Иссик қўрғонидан топилган яна бир ғайритабиий йўлбарс тимсоли аниқ тасвири билан олдингисидан фарқ қиласи.³ Бу тасвирда қанотсимон қисм ва йўлбарснинг орқа оёғи томонида тоғ тасвирини ифодалайдиган пластинка диққатга сазовор. (Ғайритабиий йўлбарс тимсоли бош кийимда ясалган). Ўрта Осиёдан скиф-сибиръ усулидаги бу сингари ғайритабиий тимсолнинг қандай шаклда эмас, қандай объектларга ишлангани ҳам муҳим аҳамиятга эга. Масалан, милоднинг I асрига мансуб қурбонгоҳга 30 та

¹ Акишев К.А. Ўша китоб, 67-бет.

² Пугаченкова Г.А., Ремель Л.И. Юқоридаги асар, 13, 118, 130-суратлар.

³ Акишев К.А. Юқоридаги асар, 86-бет, 3-сурат.

ҳайвоннинг – қанотли шер, ёки қанотли ит ҳайкалчалари бирин-кетин тарзда ясаб ўрнатилган. Мисдан ясалган бу икки қурбонгоҳ маздакийлик культини ифода этади, деган фаразни илгари суриш мумкин.

Тарихий муносабатлар, маданий алоқалар ҳам скиф-ҳайвонот усулининг бошқа ҳудудларга ва тамомила бегона этник гурухлар санъатида ҳам давом этишига асос бўлиши мумкин. Ўрта Осиёдан тортиб Хитой ва Ҳиндхитой мифологиясида йўлбарс ёки шер ҳайвонлар шоҳи ва ўрмон хўжайини тимсолида қўллангани маълум. Бу анъана архаик мифологияга ва қадимий удумлардан озиқланган ва кўплаб эртак, достонларга ўтгани шубҳасиз. Шунингдек, йўлбарс айрим халқларда тоғ ва ғор руҳи тимсолида ҳам қўлланади.¹ Ўзбек, қорақалпоқ ва қирғиз халқларининг инонч-эътиқодларида бу тимсолнинг бир-бирига яқин маъно ифодалашида ҳам маълум бир мақсад бордай туюлади. Масалан, қорақалпоқ аёлларининг эътиқодига кўра, фарзандсизликка барҳам бериш учун бир парча йўлбарс гўштини тановул қилиш кифоя бўлган экан. Қирғиз шомонлари дуоларини ўқиётганларида, ёрдам сўраб оқ йўлбарсга мурожаат қиласр эканлар. Бу сингари мисолларни кўплаб келтириш мумкин. Бу ўринда қанотли йўлбарс ёки шердан мақсад шуки, бу тасвир фақат хаёлот маҳсули сифатида ишлатилмаган, балки мифопоэтик тасаввурларнинг инъикоси, деб қараш мақсадга мувофиқдир. Албатта, мифопоэтик тасаввурлар удумлар, инонч-эътиқодлар, диний эътиқодларга таянади.

¹ Батафсил маълумот олиш учун қаранг: Миры народов мира. Том 2. – М.: Советская энциклопедия. 1992. С. – 511-512.



Қанотли одам. Жанубий Ўзбекистон ёдгорликлари орасида грек-бохторий маданиятига мансуб (милоддан олдинги II аср) медальонда эса “Тихэ-Хванида” илоҳасининг қанотли тасвири туширилган.¹ Одамнинг қанотли тасвири грек мифларининг таъсири, деб хулоса чиқариш ҳам мумкин. Аммо эллин маданияти Ўрта Осиёга кириб келмасдан олдинги қанотли инсон тўғрисида қандай фикр юритиш мумкин? Айниқса, эртакларда, достонларда инсоннинг “бир зумда” бир мамлакатдан бошқа бир мамлакатга учиб боришини қандай изоҳласа бўлади? Бу гайритабиийлик сехрли эртаклардаги образларда кўринмас қанот бор, деган фикрга олиб келади.

Илон тимсоли. Илон тасвирий санъатда гайритабиий тимсол сифатида бошқа жонзотларга қараганда қадимийроқ. Милоддан олдинги иккинчи минг йилликка оид Сўхдан топилган қора тошдан ясалган икки бошли илон шаклидаги тумор диққатга сазовор.² Бу буюм тасвиридан шу нарса англашиладики, у, биринчидан,

¹ Пугчанкова Г.А., Ремпель Л.И. Юқоридаги асар. 40-сурат.

² Пугаченкова Г.А., Ремпель Л.И. Юқоридаги асар, 5-сурат.

аёллар учун мўлжалланган бўлиши мумкин, ёки ритуал маъно ифодалаб, Ўрта Осиё халқлари мифологиясида уйда доимий сақланадиган тимсол бўлиб, ҳосилдорлик, фаровонлик, айни пайтда, эркаклик кудратининг рамзи сифатида талқин қилиш мумкин. Далварзинтепада олиб борилган археологик қазилмалар натижасида милодий I асрга оид илон шаклидаги билакузук топилган. X-XII асрларга оид Сайрамдан топилган туморчада шер, йўлбарс тасвири билан бир қаторда илонлар сурати ҳам тасвиранганд. Одатда, Ўрта Осиё заргарлари билакузуларни икки бошли илон шаклида ясашган.¹ Бу илон-тумор фақат инонч-эътиқодлар рамзи сифатида қўлланиши билан бирга, кундалик турмушда кўп қўлланадиган буюмлар ҳам илон тасвирида ясалган. Бунинг намунаси сифатида Иссиқ қўргонидан топилган уй-рўзгор буюмлари орасида сопи илоннинг боши шаклидаги чўмич характерлидир.² Қадимги туркий қавмларда илон культи муқаддас саналгани маълум, аммо илонга нисбатан турли диний оқимларнинг таъсири уни муқаддас жонзот сифатида талқин қилиш ҳақидаги қарашларни ўзгартирган. Жумладан, ўзбек халқи исломни қабул қилгандан кейин эзгулик ато этувчи “муқаддас” илонлар “мусулмон”, заҳарли илонлар эса “коғирлашибилган”.³ Илон тимсоли исломиятдан олдин эзгулик, фаровонлик, бойлик ато этувчи бўлгани учун ҳам, тасвирий санъатда муҳим ўрин эгаллаган. VIII асрга

¹ Файзиева Д.О. Ўзбек фольклорида илон образи (генезиси ва бадиияти).НДА, Тошкент, 2004,13-бет.

² Акишев К.А. Юкоридаги асар, 114-бет, 35-сурат.

³ Файзиева Д.О. Ўзбек фольклорида илон образи (генезиси ва бадиияти). НДА. 12- бет.

мансуб туркий-рун ёзувидаги Ирқ битиги (Фол китоби)даги тимсоллар гайритабийликни ўзида мужассам этгани билан диққатга сазовордир. Бу битигдан қуйидаги парчага эътибор қаратамиз:

*Altun babaşlıq jılanman. Altun qoruğsaqimın qılıçın
kasıpan özüm yol intin başımın yol abintin tir. Ança
bilinglar: yablaq ol* (VIII) – Олтин бошли илонман. Олтин қорнимни қилич билан кесганда, танамга йўл индандир, бошимга йўл уйдандир, дейдилар. Шундай билинглар: ёмондир бу¹.

Олтин бошли илон нима ёки ким? Илон шунчаки жонзот эмас, шунчаки жонзот бўлмагани учун ҳам, унга инсоний хусусият кўчирилган (ҳайвонларнинг инсон каби биринчи шахс тилидан гапириши эртакларда кўп учрайди.) Н.Раҳмонов бу парчани таҳлил қилас экан, қуйидаги удум билан боғлайди: “Агар уйда илон пайдо бўлса, уни уч кунгача ўлдириш керак эмас, тўртинчи куни эса ўлдириш керак(гап бу ўринда қадимги туркларнинг инонч-эътиқодлари тўғрисида кетяпти – Ҳ.А.). Агар илон уч кун ичida уйдан ўз-ўзидан кетса, уй эгасига даромад, бойлик келади”.² Бу ҳикоячанинг мақсади очилгандай туюлади. Лекин, бизнингча, “олтин бошли илон”

¹ Бу ҳикоячанинг талқини ва таржималари турличадир. С.Е.Малов ўзи қилган таржимани шубҳали деб қарайди (қаранг: Малов С.Е.Памяники древнетюркской письменности. М, 1951. – С. 86), Турк олими Х.Н. Ўркун ҳам айни шу ҳикоячани турк тилига таржима қилганда, сўроқ аломатини қўйган, яъни мазкур ҳикояча Ўркун учун тушунарсиз бўлган ва у ҳам бунинг удумлар билан боғлиқ томонларига диққат қаратмаган. Биз Н.Раҳмоновнинг қадимги туркийдан ўзбекчага қилган табдилини олдик (Қаранг: Н.Раҳмон. Турк хоқонлиги. – Тошкент: Абдулла Қодирий номидаги ҳалқ мероси нашриёти, 1993, 135-бет).

² Раҳмон Н. Турк хоқонлиги. – Тошкент: Абдулла Қодирий номидаги ҳалқ мероси нашриёти. 1993, 114-бет.

ғайритабиий тимсол экани бу китобда эътибордан четда қолган кўринади. Қолаверса, илонни, умуман, “Ирқ битиги”даги ғайритабиий тимсолларни таҳлил қилиш бу китобнинг вазифаси бўлмаган. Илоннинг туркий халқлар ёзма адабиётида ва фольклорида турли мақсад ва маънода қўлланишида ўзига хослик бор. Ўзбек фольклоридаги илон образи махсус тадқиқ этилган.¹ Гарчи илон культи ва унинг бадиият ҳақида махсус диссертация ёзилган бўлса ҳам, илон тимсолининг мифологик асослари, илоннинг ғайритабиий маъноси ва вазифаси, Шарқ халқлари санъатида, халқ оғзаки ижодида тутган ўрни ҳали алоҳида тадқиқот ишлари олиб боришни талаб этади. Зотан, халқ оғзаки ижодида ва илк ёзма манбаларда қандай тимсол бўлмасин, ғайритабиийликдан холи талқин ва таҳлил қилиш мумкин эмас. Жонзотлар, ўсимликлар ва бошқа буюмлардан иборат тотемлардан ташқари, “илгариғи даврларда талаффуз қилинган сўз ҳам тотем бўлган. Энди сўз ўлувчи ва тирилувчи худоларга ўша Тушунча сифатида мурожаат этади. Тотем ўзи ҳақида ўзи гапиради (бақиради, куйлайди, ижро этади); уруғчилик жамиятининг худолари ўз мифологемаларини ўзлари эмас, балки отанинг, уруғбошининг, шоҳнинг ёки коҳиннинг оғзи билан гапиради. Бу мифологемалар, “сўзлар” ўзларига (жамоага) ўзлари мурожаат этмайдилар, балки худоларга – вазифа жиҳатидан жамоанинг ўринбосарига мурожаат этадилар”². Агар “олтин бошли илон” тимсолини О.М.Фрейденбергнинг

¹ Файзиева Д.О. Ўзбек фольклорида илон образи (генезиси ва бадиияти). НД, Тошкент, 2004.

² Фрейденберг О.М. Миф и литература древности. Главная редакция восточной литературы. М.: 1978. – С. 103.

мазкур нұқтаи назари бүйича талқин қылсак, “Ирқ битиги”даги бу тимсол – тотем, уругнинг (яъни илонни муқаддас деб билган ва ўzlари учун тотем деб билган уруғ) номидан у гапиряпти, “олтин бошли илон” – уни муқаддас деб билган жамоанинг худоси. Агар О.М. Фрейденбергнинг “талаффуз қилинган сўз ҳам тотем бўлган”ини “олтин бошли илон”нинг сўзига татбиқ қиладиган бўлсак, мазкур ҳикояча метафора асосига қурилганини англашимиз мумкин. Шу билан бирга, қанотли илон айрим туркий халқлар эртакларида салбий хусусият ифодалашини инобатга оладиган бўлсак,¹ бунга, юқорида айтганимиздек, исломнинг таъсири деб қарашиберак бўлади ва қадимги тасвирий санъатда бу ғайритабиий тимсол учрамаслиги аён бўлади.

Туркий халқлар мифологиясида қушлар ва жонзотлар, шунингдек, қанотли жонзотлар уч қаватли олам моделини ифодалайди. Жумладан, илон ер ости оламини ифодалагани учун доим қанотли жонзотларга қарама-қарши қўйилади. Аммо универсал мифологиянинг айрим туркий халқларда сақлангани ва айримларида йўқолгани сабабли, турк халқ эртакларида исломдан олдинги илоннинг ғайритабиий хусусияти йўқолган, деб хулоса қилишимиз мумкин. Зотан, цивилизациялашган халқлар мифологиядан узоклашади, замонавийликнинг таъсири эртакларнинг ҳам асл моҳияти ўзгаришига олиб келади. Буни сеҳрли эртаклар мисолида янада аниқ кўриш мумкин.

Бир қўзли одам. Геродот ўзининг “Тарих” китобида Ўрта Осиёда истиқомат қилган скифлар, савроматлар, иссадонлар

¹ Стеблева И.В. Очерки турецкой мифологии. – М.: “Восточная литература”, 2002. – С. 24.

ва б. қабилалар ҳақида сўз юритар экан, бу қабилаларнинг географик жойлашуви, майший ҳаёти, турмуши билан бирга, этник таркиби, урф-одатлари ҳақида ҳам сўз юритади. Жумладан, исседонлар ҳақида тўхталганда, энг дикқатта сазовор томони сифатида қуидагиларни айтади: “Исседонларнинг ҳикоя қилишларича, бир кўзли одамлар ва олтинни қўриқловчи грифлар (йиртқич ҳайвонлар –Н.Р.) яшайдилар. Скифлар бу ҳақда иссидонларнинг сўzlари орқали хабар берадилар. Биз ва бошқалар скифлардан билиб оламиз ва уларни аrimасплар деб атаймиз: “арима” скифларда “битта” деган маънени билдиради, “спу” – “кўз” демакдир”.¹

Бу тарихий маълумотни Геродот ўзи кўрмаган ҳолда, скифлардан эшитгани бўйича ҳикоя қилган. Аммо бир кўзли одамлар ҳақиқатан бўлганми ёки иссидон қабиласи ёки скифлар бу қабила ҳақида яратган афсонами – буниси номаълум.

Бир кўзли одам (ғаройиб топшириқларни ҳал қилиш учун одатдаги иккита кўз етишмайдиган одам) рус халқ оғзаки ижодида ҳам бор бўлиб, икки кўзли одамга қарама-қарши кўйилади.²

Бир кўзли одам туркий халқлар эртаклари ва достонларида кенг тарқалган. Жумладан, ёқут халқ сехрли фантастик эртакларида бир кўзли одам тимсоли дикқатта сазовор. Бу тимсол “Чўпчўкин” эртагида бор. Чўпчўкин кўлда балиқ овлаб, оиласини боқарди. Бир куни тонг отгач, кечқурун ташлаган четандан хабар олиш учун кўлга келди. У келиб, қайиқдан сувни олиб ташлашни бошлаган эди, бирдан ғарб томондан келаётган кучли шовқинни эшитиб қолади.

¹ Геродот.История. Научно-издательский центр «Ладомир». – М, 1993. – С.193.

² Миғы народов мира, том 2. – С. 246.

Кўп ўтмай, ваҳимаю шовқин-сурон билан *абаасининг*¹ бир кўзли ўғли келиб қолади. Чўпчўкин бир кўзлининг талабини бажариб, икки ёшли тойини беради. Абаасининг бир кўзли ўғли тойларни еб қўяди. Охири Чўпчўкин бир кўзлининг талабини бажаришга имкони қолмагач, Чўпчўкиннинг ўзини еб қўяди. Чўпчўкиннинг тирик қолган бир ўғли ва бир қизи буқачанинг устига миниб қочадилар. Бир кўзли ўғил қизни еб қўяди, бир қанча саргузаштлардан сўнг, буқачанинг юраги ва жигаридан пайдо бўлган икки ит бир кўзлини ўлдирадилар ва бу ҳақда Чўпчўкиннинг ўғлига хабар берадилар.²

Эртакдаги бир деталга – бир кўзлининг ғарб томондан келганига эътибор берайлик. Эртакда ҳикоя қилинишича, бир кўзли одам Ғарбдан келади. Айрим халқлар маданиятида Ғарб рамзи қўркув маъносига эга.³ Умуман, Ғарб рамзи кўпчилик халқларда ўлим, ёмон рухлар макони маъносини ҳам ифодалайди. Ана шу маънолари ҳам туркий халқлардаги бир кўзли одам тимсолида ҳам бор бўлиб, бизнингча, унинг қуи оламдан келиб чиққанига ишора қиласди. Уч қаватли олам моделининг мазкур ғайритабиий тимсоллар орқали бу эртакда ифодаланган.

¹ *Абааси* –ёкут фольклорида душманнинг умумий номи, у Қуи ва Юқори оламда истиқомат қиласди; мифларга ва қадимги инонч-эътиқодларга кўра, ёвуз рух *абааси* одамларга зарар келтиради, хасталик олиб келади. Унинг акси *айши* бўлиб, инсониятга ҳомийлик қиласиган мифологик илоҳларнинг умумий номи; айни ёкут олонхоларида ва ва эртакларида “одам”, “бизнинг одам” маъноларида кўлланади (каранг: Якутские народные сказки. Новосибирск, “Наука”, 2008. – С. 416).

² Якутские народные сказки. – Новосибирск: «Наука»: 2008. – С. 185–195.

³ Тресиддер Джек. Словарь символов. М.: “Фаир-пресс”, 1999. – С.359.

П БОБ

ИККИ ҚИЁФАЛИ МИФОЛОГИК ПЕРСОНАЖЛАРДА ҒАЙРИТАБИЙ ВА ЗАМИНИЙ ЭЛЕМЕНТЛАРНИНГ ҚОРИШИҚЛИГИ

Туркий халқлар оғзаки ижодида икки қиёфали қаҳрамонларнинг биттаси албатта одам бўлади. Одам ўрта оламда истиқомат қиласиган жонзот. Бошқа оламларга – юқори оламга (масалан, қўринмас қанот билан юқори оламда чиқса) чиқса, ижобий қаҳрамон, қуий оламга чиқса. салбий қаҳрамонга айланади. Аввало, инсоннинг қушга (масалан, каптарга) айланиш лавҳаси кўп учрайди. Ўзбек халқ эртакларидан “Беш қиз” эртагида қизнинг турли қуш ва ҳайвонларга айланиши лавҳасига мурожаат этамиз.

...Қиз отасининг сўзини қайтара олмай, хўп деди. Шу куни кечаси билан оқиб, тонг отганда мени *одам* суратига киргизди. Подшо билан хотини мен билан қайтадан кўришди. Бир оздан кейин подшонинг боғига чиқиб, ўтирган эдик, шу орада осмонда бир кабутар пайдо бўлди. Қиз ўрнидан туриб: “Жоду қилган *дев* мен билан курашгани келди”, деди. Ўзи дуо ўқиб, бир катта *қора қуши* бўлди, каптар билан олишди. Бир вақтда каптар ерга тушиб, юмалаб *ит* бўлди. Қиз юмалаб *шер* бўлди – яна олишди. Охирида турли нарсалар бўлиб, бир-бирларини енга олмади. Қизнинг аччиғи келиб, бир катта *ўт* бўлиб, девни куйдирди...

Дев ёки бошқа махлукот ҳам инсонга айланиши ҳам мумкин. Масалан: Дев индамай овқатни еб, фор оғзидағи

арқон билан болтани олиб, одам суратига кириб, шаҳарга тұғри тикувчи ёнига борибди.

Бу сингари ғаройиботлар мифологиянинг маҳсули бўлгани учун ҳам, “яхши” ва “ёмон” кучлар – жонзотлар қиёфасидаги дев ва қизнинг мифик эврилишлари тотемларга бўлган ишончдир. Тотемларга илк марта ишонч-эътиқод шаклланганда, “яхши” ва ”ёмон”лар ҳақидаги тасаввурлар ҳам шаклдана бошлаган. Бу даврда “цивилизациялашган оламда жиддий фаолият кўрсатиш учун “ёввойиликнинг ақлий ривожланишига мосланган мифнинг пайдо бўлиш тамойиллари”¹ шу йўл билан сақланади. Мифик эврилиш буддавийликда айниқса кенг тарқалган. Масалан, қадимги хинд мифологиясида еттига *риши* – донишманд, башортчи бор. Шулардан бири Гаутама бўлиб, буддавийлик мифологиясида у Будда Шакямунининг исмидир. Ривоятларга қараганда, Гаутама 550 марта туғилиши жараёнида бақа, балиқ, қарға, маймун ва бошқа кўплаб ҳайвонлар тимсолида зоҳир бўлган. Унинг издошлири бошқа нарсага айланиб, ўзгаришларнинг мифологик характерини англашдан шунчалик узоқ эдиларки, бу эврилишларга инончнинг маҳсули сифатида будда ибодатхоналарида қолдиқ сифатида буюк устоз истиқомат қилган жонзотларнинг жуни, қанотлари, сүяклари сақланиб қолган.²

Ғайритабиий тимсоллар ва уларнинг остидаги мифологик тасаввурлар ҳар доим ҳам ўз маъносида ва булардан кўзланган мақсадда қабул қилинавермаган. Ярми ҳайвон ва ярми инсон шаклидаги жонзотларни цивилизациялашган халқлар ҳайвонсифат деб қабул қилганлар. Инсон ўз ақлий

¹ Тайлор Э.Б. Юқоридаги асар, 180-бет.

² Тайлор Э.Б. Юқоридаги асар, 200-бет.

ривожига кўра мифлар яратилган даврда турган бўлса ва бирон ҳодиса ёки одат уни ҳайратга солсаю сабабини ўзи билмаса, у эртакни ўзи тушунадиган ҳолда ўйлайди ва ҳикоя қилиб беради. Ҳатто эртакчининг ўзи ҳам бунинг отабоболаридан қолган ҳақиқий афсона эканига ишонмаса ҳам, бу афсонани ундан эшигтан ва такрорлайдиган қабиладоши бу вазиятдан ҳайрон бўлмайди, чунки эртакчи ҳам шу муҳитда улғайган, шу муҳитда яшайди.

Этнологлар (халқнинг келиб чикиши, ёйилиши ва халқ билан боғлиқ бошқа жараёнларни ўрганадиган соҳа одамлари, этнографияга яқин туради) қадимги даврда ҳам бўлган. Улар маълум ҳодиса-воқеанинг ифода усулинин ўрганиб ва у ҳақда маълум хулосага келиб, халқ жонлантириш орқали миф ёки эртакларга киритган тимсолларни халқ билан ўша тимсоллар ўртасидаги реал муносабатлардир, деб тасаввур қилганлар. Жонлантиришга асосланган ғайритабиий тимсолларни тасвирий метафоранинг намуналари, деб қараш мумкин.

Сибирь туркий халқлар фольклорида, Ўрта Осиё халқлари фольклоридагига нисбатан, туркий халқлар диний-мифологик тизими аслиятини сақлаган. Буни, айниқса, қушлар ва ҳайвонларнинг мифологик мазмунида ва бу образларнинг фаолиятида аникроқ кўриш мумкин.

Умуман, қушлар дунёдаги ҳамма халқларнинг мифологиясида муҳим роль ўйнайди. Биз туркий халқларда шу пайтгача яратилган қушлар билан боғлиқ тадиқоқотлар ва олимларнинг кузатувларини эътиборга олган ҳолда, куйидагича фикрни илгари сурамиз:

Биринчи навбатда, қушлар диний-мифологик тизимнинг ва удумларнинг бир тимсоли бўлиб, турли вазифаларга эгадир:

кушлар илоҳлар, тотем ота-боболар, маданий қаҳрамонлар, демиург (грек. “уста”, “яратувчи”, “халқ учун яратиб берувчи”), инсонлар томонидан айлантирилган худолар, шомонлар, қаҳрамонлар миниб юрадиган ҳайвонлар бўлиши мумкин. Улар илоҳий моҳиятнинг, юқорининг, осмоннинг, осмон руҳининг, қуёшнинг, момақалдироқнинг, шамол, булутнинг мифопоэтик классификатори ва рамзи, космик зоналар, эркинликлар, ҳаёт, ҳосилдорлик, мўл-кўллик, кўтарилиш, чиқиш, илҳомланиш, башорат, каромат, рух, ҳаёт руҳи ўртасидаги алоқа ҳисобланади.¹ Бу ўринда юқоридаги эртаклардан олинган парчадаги кушларнинг мифопоэтик вазифаси қайси бирига тўғри келади, деган савол туғилиши мумкин. Масалан, қора қуш, шер тимсолида илоҳларни ҳам кўришимиз мумкин, чунки булар қизни ўлимдан қутқариб қолдилар ва илоҳий моҳиятнинг ҳамда юқори оламнинг рамзига тўғри келади. Айни пайтда қора қуш ва шер шомон ҳамда ҳаёт руҳи рамзини ифода этади ва ҳ.

Эртакларда жонзотларнинг ёки инсоннинг ғайритабиий пайдо бўлишида кенг тарқалган мифологема – ҳайвон ёки инсоннинг руҳи мавжуд. Яна “Чўпчўкин” ёқут халқ эртагига қайтамиз.

Эртакда буқача инсоннинг вазифасини бажаради. Буқача Чўпчўкиннинг ўғли ва қизини бир қўзли одамдан қутқаргач, бир жойга етиб келдилар. Буқача иккаласига: “Менинг пешонамдан битни қидириб кўринглар-чи, у мени еб ташлади, – деди. Улар ўргимчак катталигидаги битни топдилар. – Ана шу битни ўлдир, – деб буқача қизга айтди. Қиз битни ўлдирди. – Энди мен ўламан, – деди буқача. – Ўлма, ўлма! – дедилар бола билан қиз. – Менинг руҳим

¹ Стеблева И.В. Юқоридаги асар, 31-бет.

ўлди, уни сизлар ўлдирдингизлар. Яхшиси, сизларга васиятимни айтай, қулоқ тутинглар! Менинг теримни шилиб олинглар. Сўнгра: “Уй бўл”, деб тери ни ёйинглар. Бош суягимга: “Печ бўл, деб, танамнинг тўрт бурчига: “Тўртта устун бўл”, деб, орқа елкамга: “Хари бўл”, деб “юрагим ва жигаримга: “Қора темир итлар бўлинглар”, деб лахта қонимга: “Итнинг емиши бўл”, деб тўртта туёғимга: “Тўртта ётоқхона бўлинглар”, деб ташланглар, тери остига кириб ётинглар...Алвидо! – деб буқача жон берибди”.

Бу ўринда ҳар бир тана аъзосининг маълум объектга айланиши ҳодисаси руҳнинг кўчишини англаш мумкин. Шу билан бирга, буқачанинг ўз тилидан айтилаётган “руҳим ўлди” ибораси диққатга сазовор. Бу ўринда бит буқачанинг руҳини моддийлаштирган, руҳ моддиётга айланган. Яна шуни таъкидлаш керакки, руҳ – ҳаётий қудрат, куч-куватнинг жонлантирилиши, инсон иродасининг қудратидир. Руҳнинг ўлиши – йўқолиши эмас, балки бошқа моддий нарсаларга айланишидир. Руҳ тимсоли, юқоридагидай бошқа ғайритабии жонзотлар тимсоли сингари, Миср, Бобил, Қадимги Юнонистон мифологиясида универсал мифологема ҳисобланади.¹ Руҳ рамзи Жанубий ва Шарқий Сибирь халқларининг аксариятига хосдир. Бу ёқут халқ эртагини миф деб ҳам қарап мумкин.

Жонзотларнинг бир қиёфадан иккинчисига – инсонга ёки инсоннинг бирон жонзотга ёки қушга айланиб қолиш сюжетларида ҳам руҳ асосий роль ўйнайди. Зотан, эврилишларда моддиёт ва руҳнинг ўзаро муносабати ётади. Турк халқ эртакларидан “Чамбар диёр” эртагидаги

¹ Миғы народов мира. Т. 1. – С. 443.

моддий нарсаларнинг инсон руҳини ўзида мужассам этиши бу жиҳатдан диққатга сазовор.

Бир подшоҳнинг учта қизи бор экан. Улардан иккитаси вазирларнинг ўғиллари турмушга чиқиб, баҳтиёр яшай бошлабдилар. Улар бир куни подшоҳ отасини кўргани келиб, энг суюкли отдан хабар олгани отхонага кирибдилар. Бу от узумдан бошқа нарса емас экан. Иккала катта опа отхонага бораётиб, турмушга чиқмаган сингилларини ҳам олиб борибдилар. От катта опаларнинг қўлидан узум ейишни хоҳламабди, кичик қиз берганда эса, от узумни ебди. Эртаси кун ҳаммаси такрорланибди, от лабларини подшоҳнинг кичик қизига тегизибди. Опалари эса қўрқиб қочиб кетибдилар. Шунда *от* бир силкиниб, чиройли йигитга айланибди ва қизга, менга турмушга чиқ, деб илтимос қилибди. Қиз рози бўлибди, отасига, мен ҳеч кимга турмушга чиқмайман, сизнинг ёнингизда қоламан, дебди. Подшоҳ рози бўлибди ва қизига яхши кўрган отини ҳадя қилибди. Йигит билан баҳтли ҳаётнинг асосий шарти сирни саклаш экан: от ҳақиқатан чиройли йигит эканини ҳеч ким билмаслиги керак экан. Кунларнинг бирида жангдаги маҳоратни кўрсатадиган беллашув бўлибди. Катта опаларининг эрлари отларини миниб, жанг майдонига йўл олибдилар, опаларининг ўzlари эса кичик сингиллари олдига келиб, эрларининг қаҳрамонлигини кўкларга кўтариб, мақтанибдилар. Аммо кутилмаган воқеа юз берибди: бирдан жанг майдонида қизил отда ёш йигит пайдо бўлибди, унинг кийимлари қизил, қўлидаги таёғи ҳам қизил экан. У иккала куёвни ҳам енгиб, ғолиб бўлибди, майдондаги ҳамма нарсани остин-устин қилиб, кўздан ғойиб бўлибди. Эртаси куни подшоҳнинг катта қизлари эрларини мақтаб турганларида, майдонда ўша йигит пайдо

бўлибди, энди у оқ кийимда, оқ отда ва қўлида оқ таёқ бор экан. У ҳаммани енгибди, ўша ерда турганлар: “Бу йигит ким бўлди экан?” – деб бир-бирларидан сўрай бошлабдилар. Шу пайт подшоҳнинг кичик қизи чидаб туролмабди-да, сирни ошкор қилиб: “Бу менинг қайлиғим”, – дебди. Қиз ўша заҳоти отхонага бориб, йигитнинг от терисини ёқиб юборибди. Йигит эса ўша заҳоти *каптарга* айланибди-да, қизнинг олдига келиб, шундай дебди: “Эҳ гўзалим, сен менга қўлингдан келган энг ёмон ишни қилдинг. Энди бу ерда қолишим мумкин эмас. Алвидо. Энди мени Чамбар диёр деган ном билан излайсан. Мени топгунингча, узок вақтлар ўтади, темир чориқларинг тўзийди, темир ҳассанг эгилади”. Шуларни айтиб каптар учibur кетибди, қиз эса йиглаб қолаверибди, аммо қайлигини излаб йўлга отланишга қарор қилибди. Отаси қизига темир чориқ ва темир ҳасса ясад беришларини буюрибди. Шундан сўнг қиз йўлга тушибди. Қиз узок йўл юриб, бир булоқ ёнига келибди. Қиз темир ҳассаси эгилганини, темир чориги тўзиб кетганини шу ерга келганда билибди.

Қайлиги шу атрофда эканини қиз фаҳмлабди. Қиз дам олгани булоқ бўйига ўтирибди. Шу орада Чамбар диёр билибдики, бир бечора сув сўраб булоқ бўйида ўтирибди. Чамбар диёр ўша томонга йўл олибди, ўз севгилисини олмага айлантирибди-да, чўнтағига солиб, уйига келибди. Бу уй девларнинг макони экан. Ҳамма девлар бирдан: “Инсон гўштининг хиди келяпти!” деб бақирибдилар. Аммо Чамбар диёр девларни, қизга тегмайсизлар, деб кўндирибди. Девлар қизга зарар етказмасликка қасам ичибдилар, аммо бу қасамни қандай бузсак экан, деб баҳона излай бошлабдилар. Девларнинг онаси қизни ейишга баҳона топиш учун айёрглик билан қийин ишларни буюраверибди. Аммо Чамбар диёр

қизга ёрдам бериб турибди. Чамбар диёр ва қиз ҳамма девларни енгиш мумкин эмаслиги билиб, қочиб кетишга қарор қилишибди. Улар қочиб, девлар эса уларни қувлаб кетаётгандарида, қизни боққа, йигит ўзини эса бозбонга айлантирибди, Кейин йигит қизни дарахтга, ўзини эса дарахтни ўраб турган катта илонга (юқоридаги илон тимсолиги қиёсланг, бу ўринда ҳам илон тимсоли ҳомий, исломдан олдинги мифологик мазмуни сақланган – Ҳ.А.) айланибди. Кейин иккаласи гулчамбарга айланибдилар ва қизнинг отаси – подшоҳнинг қўлига бориб қолибдилар, яна тариққа айланиб, подшоҳнинг тўни остига яшириниб олибдилар....Хуллас, йигит билан қиз шу тариқа девлардан омон қолибдилар.

Бу эртакда олма, дарахт, гул, тариқ (дон) ҳосилдорлик, мўл-кўллик, муваффақият рамзини ифодалайди. Бог эса ўсимликларнинг йигиндиси сифатида нафақат ҳосилдорлик, балки абадий ҳаёт рамзини ифода этади.¹ Яна шуни қўшимча сифатида айтмоқчимизки, йигит билан қизнинг турли жонзот ва нарсаларга айланиши инсониятнинг ибтидоий фикрлаш тарзига – табиатдан ажрала олмаган даврга, ўзини табиат билан яхлит ҳолда тасаввур қилган даврга ишора қиласди.

Эртакнинг ғайритабиий тимсоли – Чамбар диёр ва у билан боғлиқ воқеалардир. Шу ўринда, гарчи от ҳақида ўзбек фольклоршунослигида кўплаб ишлар қилинган бўлса ҳам, бу эртакдаги от қиёфасига оид бўлган мўъжиза ва у билан боғлиқ мифологик тизим ҳақида қисқача тўхталиб ўтишни лозим, деб биламиз. Отнинг мўъжизавий тимсоли – универсал мифологема. Бу тимсол Евроосиё мифологиясида муҳим роль ўйнайди. Шу билан бирга, бир қатор

¹ Миры народов мира. Т. II. – С. 369.

худоларнинг атрибути ҳам ҳисобланади. Мифологик от хақидаги ҳикоялар қадимги ҳинд, кельт ва славян мифологиясида ҳам маълум. Худоларнинг отлари ҳақидаги ҳинд-европа мифологиясидаги тасаввурларга мосликни отларни қурбонлик қилиш удумларида кўриш мумкин: жумладан, қадимги ҳинд мифологиясида отнинг қурбонлик қилиниши оламнинг уч қаватига tenglashstiirladi. Бу удум қадимги рим, славян ва герман халқларида ҳам учрайди.¹ Айни пайтда қадимги ҳинд мифологиясидаги *олам дарахти* ҳам от рамзи орқали ифодаланган.² Ҳинд мифологиясида икки тимсолнинг бир-бирига tenglashstiirlgанини эътиборга олсак, мазкур эртакдаги “от” олам дарахтини ҳам ифодалайди, деган фикрни ўртага ташлашимиз мумкин. Зотан, эртакдаги отга боғлиқ фазо тушунчasi “ўсимлик (*гулчамбар, тарик*) – ҳайвон (*от, илон*) – инсоният” модели орқали ифодаланади. Эртакнинг ички тузилишини ташкил қиласиган аниқ мифологик тизимга таяниб ҳамда уч қаватли олам модели отга боғлиқ эканини ҳисобга олиб, от олам дарахти рамзини ифодалаши билан туркий халқларга мансуб бу эртакдаги ғайритабий от тимсоли ўртасида қандай алоқадорлик бор? Қадимги ҳинд мифологиясидаги от рамзининг олам дарахтини ифодалаши ва қурбонлик қилинишига оид тасаввурлар билан Марказий Осиёдаги туркий қавмларнинг от тимсоли олам дарахти рамзини ифодалаши ҳақидаги мифологик тасаввурлар ва удумлари билан мос келишига сабаб тарихий алоқалардир.

¹ Миғы нардов мира. Том 1. – С.666.

² Миғы нардов мира. Том 1. – С.144.

Кўп тарқалган нуқтаи назарга кўра, II минг йилликдан олдин Ўрта Осиёдан, хусусан, Амударё ва Сирдарё оқими бўйлаб жойлашган ўлкадан тортиб Орол ва Каспий дengизларигача чўзилган юртдан Ҳиндистонга арийлар қабиласи бостириб кирган (М. Майрхофер, И.М.Дъяконов, Т. Боррау ва бошқа кўп шарқшунослар шу фикрда). Ана шу даврдан бошлаб арийларнинг алоҳида қабилалари турли томонга кўча бошлаганлар. Бу кўчиш II минг йилликнинг ўрталарига тўғри келади. Улар Ўрта Осиёдан Афғонистонга, у ердан Ҳиндикуш тоғлари орқали Ҳиндистонга – ҳозирги Панҷоб вилоятига ўтганлар. Арий деган номни Ҳиндистондаги қабилалар қўйган эмас, балки Ўрта Осиёдан борган қабилаларнинг ўзлари олиб борганлар. Арийлар “нафақат ҳарбий истеъоди билан, балки бадиий сўз соҳасидаги иқтидори билан ҳам ажралиб турганлар...Бу қабилаларнинг энг асосий хазинаси мадҳиялар бўлиб, келгусида жамланган Ригведаларнинг асосида ана шу мадҳиялар ётган эди”.⁴ Арийларнинг бошқа ўлкалардан Ҳиндистонга киргани тўғрисида бошқа фикрлар ҳам бор,⁵ аммо кўпчилик рус ва Европа шарқшунослари арийлар дунёнинг кўп томонларига Ўрта Осиёдан тарқалганини айтадилар.

“Ригведа” билан “Авесто”нинг қариндошлиги масаласини далиллашда олимлар, тарихий алоқалардан ташқари, лингвистик омилларга ҳам таянадилар. Мутахассисларнинг фикрича, “Ригведа” билан “Авесто” тилининг бири–бирига яқинлиги (айниқса, “Ригведа”даги

⁴ Елизаренкова Т.Я. Юқоридаги китоб, 426–бет.

⁵ Елизаренкова Т.Я. Юқоридаги китоб, 437–бет.

мандал ва “Авесто”даги готлар) шу даражадаки, баъзан иккала ёзма манбадаги матн бир архаик матннинг икки вариантига ўхшаб кўринади, факат товушлар мослиги қоидаларида фарқ бор, холос. Ана шу яқинлик туфайли ҳам айрим олимлар ўтган асрнинг биринчи чорагида “Авесто”даги баъзи шеърлар “Ригведа” тилига таржима қилинган, деган фикрга келдилар. “Авесто”дан қилинган бу таржималарни ведаларнинг аслиятидан фарқлаб бўлмаган.

“Ригведа” билан “Авесто”нинг тили, жумладан, поэтик нутқнинг яқинлиги тадқиқотчиларнинг дикқатини тортган. Ҳар икки ёзма ёдгорликдаги мифологик мерос ҳар бирдир – иккаласи ҳам арийлар мифологиясидан озиқланган. Аммо диний тизим “Авесто” ва “Ригведа”да фарқли бўлгани учун ҳар иккаласида ҳам бу тизим ўз тараққиёт йўлидан кетди. Тил ва мифологик мероснинг ҳар иккала манбада бирлиги айрим сўзларнинг маъно ва вазифалари солиштирилганда маълум бўлади. “Ригведа”да *deva* – “Авесто”да *daeva* сифатида талаффуз қилиниб, биринчисида “худолар” маъносини, “Авесто”да эса бу сўз “иблислар” маъносини билдиради. “Авесто”да *ahura* сўзи “Ригведа”да *asura* деб айтилади ва биринчисида факат худоларни (масалан, Ахурамазда ёки Хўрмузд) билдирса, “Ригведа”да худолар (масалан, Митра, Варуна каби) нинг эпитети вазифасида қўлланади.

“Ригведа” билан “Авесто”нинг мифологик қаҳрамонлари ўртасидаги умумийлик шуни кўрсатадики, исмларнинг лингвистик жиҳатдан бирлиги, қолаверса, ҳар иккаласида вазифа ва сюжет жиҳатидан ўхашлиги улар ўртасидаги қариндошлиқ алоқаларидан далолат беради. “Ригведа”да *Yata*, “Авесто”да *Yima*, “Ригведа”да

Vata, “Авесто”да *Vita*, “Ригведа”да *Vayu*, “Авесто”да *Vayu* ва ҳ. исмларда айнан шуни кўриш мумкин.

“Ригведа” ва “Авесто” икки диний тизимга мансуб бўлса ҳам, иккаласи учун умумий бўлган культлар бор. Жумладан, олов культи ҳар иккаласида заминда қурбонлик куйдириши, осмондаги қуёш ва бошқа самовий илоҳларга оид ҳамма хусуиятларни қамраб олади; ёки муқаддас ўсимликлар культи тўғрисида маълумот берилганда, ҳар иккала манбада ҳам бу ўсимликлардан бокий умр ато қиласидаган ичимлик тайёрланиши тўғрисида сўз кетади. Шунингдек, ҳар иккала манбада мадҳия-ибодатлар ҳам умумий мазмунга эга.

Умуман олганда, ҳар иккала халқнинг ёзма ёдгорликларини жалб қилган ҳолда, умумий мифологияни ўрганиш келгусида амалга ошириладиган вазифалардан биридир. “Олтун ёруғ”даги Зерван ва Хўрмузднинг мифологик асосини ведалардан, хусусан, “Ригведа”дан бошлиш масалага кўп ойдинлик киритади.¹

¹ Батафсил маълумот олиш учун қаранг: Олтун ёруғ. Сўз боши, изохлар ва қадимги туркийдан ўзбекчага табдил муаллифи Н. Раҳмон. – Тошкент: Фан, 2009. 8-бет.

ХУЛОСА

Исломиятдан олдинги қадимги туркий ёдгорликлар, маданий обидалар, тасвирий ва амалий санъат намуналари ижоднинг ўзига хос хусусиятини мужассам этади. Ибтидоий фикрлаш тарзи “аклий қолоқлик”ни эмас, балки инсониятнинг ҳар доим оламни билишга интилиб борганини далиллайди. Бунинг маҳсулси сифатида мифлар шаклланди. Бу жараён инсониятнинг ўз қарашларини бадиий йўсинда ифодалашни, оламни билиш натижасида эстетик завқ олиш лаёқатини шакллантириди. Инсон табиий ҳодисалардан, буюмлардан эстетик завқ ола билди.

Туркий халқлар яратган мифлар, афсоналар, эртаклар, илк ёзма адабиёт намуналаридаги ғайритабиий тимсолларни таҳлил ва талқиши қилиш шуни кўрсатмоқдаки, қадим аждодларимизнинг мушоҳада қилиш, яратувчилик қобилияти ғоят юксаклиги билан алоҳида ажралиб турган. Ғайритабиий тимсоллар барча туркий халқларда умумий, айни пайтда барча туркий халқларда ўша тимсоллар бир хил маъно ва вазифада кўлланади. Эртак ва достонлардаги айрим жузъий хусусиятлар ижтимоий вазият – маълум бир диний оқимларнинг маълум бир туркий халқларда барқарорлашуви билан боғлиқ. Бу вазият, шубҳасиз, туркий халқлар диний-мифологик тизимига мансуб ғайритабиий тимсолларни таҳлил ва талқин қилишда ана шу жиҳатларини ҳам назарда тутишни тақозо қиласи.

Туркий халқлар халқ оғзаки ижоди ва қадимги ёзма адабиётидаги ғайритабиий тимсолларни ўрганиш шундан далолат беряптики, бу йўналиш Ўзбекистонда энди

бошланяпти. Зотан, туркий халқлар мифологияси маҳсули бўлган ғайритабиий тимсоллар кўп масалаларга – фикрлашнинг турли кўринишлари ва омиллари, бадиий тафаккур тадрижи, Шарқ ва Европа билан тарихий алоқалар ва мифологиянинг ўзаро таъсири, туркий халқлар сеҳрли эртаклари ва санъатнинг ўзаро муносабати каби кўп масалаларга ойдинлик киритади.

МУНДАРИЖА

Кириш.....	3
------------	---

I ФАСЛ

Илк бадиий тафаккурда икки қиёфали мифологик персонажлар вазифадошлиги.....	7
Қадимги санъат асарларида икки қиёфали тасвирлар ва уларнинг мифологик асослари.....	23

II БОБ

Икки қиёфали мифологик персонажларда гайритабиий ва заминий элементларнинг қоришиклиги.....	41
Хулоса.....	53

ҲАМЗА АЛЛАМБЕРГЕНОВ

ҒАЙРИТАБИЙ ОБРАЗЛАРНИНГ МИФОЛОГИК АСОСЛАРИ

Мұхаррір:
Акром Декон

Техник мұхаррір:
Файзулло Азизов

Дизайнер:
Асқар Ёқубжонов

«Мұхаррір» нашриёти
Лицензия: АI № 099. 2008 йил 24 март

Теришга 2013 йил 07 январда берилди.
Босишига 2012 йил 14 февралда рухсат этилди.
Бичими: 60x84 $\frac{1}{16}$. «Virtec Times» гарнитурасыда
оффсет босма усулида оффсет қофозида босилди.
3,5 шарт. б.т. 2,8 ҳисоб нашр. таб.
Адади 500 нусха. 18-сон буортма.

«Мұхаррір» нашриёти матбаа бўлимида чоп этилди.
100060, Тошкент шаҳри, Элбек кўчаси, 8-уй
E-mail: Muharrir@list.ru

ISBN 978-0943-25-226-4



9 789943 252264